









SENTIMENS
Sur la Dishnchon des Manieres de Peinture
Dessin et Graueure, et des Originaux et Coppies & d.
Par A Bosse Graueur en taille douce, A PARIS, 1645;



SENTIMENS

DISTINCTION

DES

de Peinture, Dessein & Graueure, & des Originaux d'auec leurs Copies.

ENSEMBLE

Du choix des Sujets, & des chemins pour arriver facilement & promptement à bien Pourtraire.

Par A. Bosse, Graueur en Taille-



A PARIS, Chez l'Autheur, en l'Isle du Palais, Sur le Quay qui regarde la Megisserie.

M. D.C. XLIX.

AVEC PRIVILEGE DV ROY.

at the little things of the manufactured the transfer of the same

A MESSIEVRS,

L'ACADEMIE ROYALE,

DE LA PEINTVRE

& Sculpture.



ESSIEVRS,

Si j'auois presenté ce petit Traitté à quelque particulier peu entendu en la matiere qu'il contient, il y auroit lieu d'y trouuer à redire, en ce que je n'aurois deu attendre ny de sa censure ny de son approbation, la satisfaction que je peux esperer de vostre equité, puis que vous estes juges Compe-

tens en cette cause, & que personne ne vous le doit disputer auec raison. Ainsi, MESSIEVIS, j'ay creu que vous trouveriez bon que je vous suppliasse de me faire justice sur ce sujet; Et comme lors que j'eus l'honneur d'estre appelle de vous, il y a environ un an, pour m'expliquer dans vostre Academie sur le sujet de la Perspe-Etine, à quoy nous adjoustames ce qui est des Cinq Ordres Antiques de l'Architecture, je vous fis instance d'examiner ce que j'en pouuois sçauoir, vous assurant que j'estois beaucoup plus d'inclination à estre instruit, que d'instruire les autres, vous me permettrez de vous reiterer icy la mesme Supplication, & de vous offrir ce petit Liure auec le mesme dessein; Et j'ose me promettre de vostre faueur que vous me ferez la grace de m'en

dire vos sentimens, qui me seruiront de regle pour me corriger ou
pour m'aduancer, suiuant le jugement que vous en serez; C'est ce
que vous demande celuy qui tiendra tousiours à tres-grand honneur
de se pouvoir dire,

MESSIEVRS,

Vostre tres-humble & tresaffectionne seruiteur, A. BOSSE.



SOMMAIRE

de ce qui est contenu dans ce Traitté, auec l'explication de quelques mots dont se servent les Peintres.

Roor que j'ayefait ce petit Traitté le plus succint qu'il m'a esté possible, comme estant vn abbregé de plus grands Ouurages, j'ay creu neantmoins qu'on auroit quelque sorte de satisfaction de voir tout d'vn coup ce qu'il contient, & qu'il estoit à propos auparauant que d'en commencer le discours que je remarquasse dans la suitte des chapitres l'ordre que j'y ay gardé. A quoy j'adjousteray en suitre pour vne plus grandé intelligence de ceux qui ne seroient peut-estre pas assez versez dans la connoissance des choses, qui regardent la Peinture, & qui auront la curiossité de le lire, l'explication de certains mots dont on se sert, & qui sont particuliers en cét Art.

M'estant donc proposé de dire mes Sentimens touchant la connoissance des Ouurages de la Pourtraiture, (qui est vn mot general qui comprend & la Peinture & la Gra-

ueure, & en vn mot qui signifie la representation de quoy que ce soit par quel moyen que ce puisse estre, ainsi que j'ay deduit plus au long dans mon liure de la Perspectiue) Ie commence par la distinction de ce qu'on appelle Original d'auec vne Copie, & par la deduction de quelques moyes dont on se sert pour representer sur vne surface platte, qu'on nomme ordinairement Tubleau, non seulement vn ou plusieurs objets de la Nature, maisencore ceux qui partent de la seule imagination & de l'inuention du Peintre ou du Desseignateur, & cela est traitté dans le premier Chapitre.

Dans le deuxième Chapitre, je déduis quelques raisons que croyent auoir diuers Peintres & Curieux, sur la Connoissance & distinction des differentes manieres de Desleigner & de Peindre, & des Originaux d'auec

leurs Copies.

Au troisième, je déduis mes Sentimens sur chacune de ces raisons, & sur quelques

autres particularitez.

Le quatriéme, contient le discernement des diuerses manieres de plusieurs Peintres & de diuers Païs; ensemble leurs noms, & en quelque sorte le temps qu'ils viuoient, & aussi leur degré d'estime, suivant les divers Gousts.

Le cinquiéme, donne quelque ouuerture pour faciliter la distinction des Tableaux Originaux d'auec leurs Copies.

Et parce que ces cinq Chapitres, compren-

nent tout ce que j'ay eu dessein de dire presentement pour la connoissance des Tableaux j'en fais auparauant que de passer à vne autre matiere, vne petite recapitulation dans le sixiéme Chapitre.

Et dans le septiéme, je traitte en quelque forte de la distinction de quelques Tailles-Douces Originales d'auecleurs Copies, en-

semble les noms de diuers Graueurs.

Et finalement dans le dernier, qui est comme surabondant en cette matiere, que j'ay mis pour la satissaction de ceux qui prennent plaisir à Pourtraire, j'ay donné à connoistre le choix qu'on doit saire des Sujets sur lesquels on se peut former, & le chemin pour suiuant l'aptitude d'vn chacun, arriuer promptement à bien Pourtraire, & vn moyen pour faire saire aux Tableaux l'esset qu'ils doiuent suiuant leur position, & de la Station ou distance de l'œil de ceux qui les doiuent regarder.

Definitions de quelques mots de cét Art, citez en diuers lieux de ce Traitté.

Du Grand , de la Grande, & Riche Maniere ou bon Goust,

Ne veut dire ou fignifier autre chose, qu'vn Tableau bien fait & suiuant le Goust ou opinion des plus sçauants Peintres.

Pauure & chetiue Maniere, ou mauuais Goust,

Ne doit estre entendu que d'vn Tableau mal fait, & contraire à ce bon Goust des Sçauans.

Belle Ordonnance & Disposition,

C'est quand dans vn Tableau, les Corps ou Figures qui le composent, y sont si bien disposez ou placez, qu'ils donnent agréement à l'œil ne s'y trouuant point à moins que de necessité des endroits trop vastes, & denuez, vuides & consondus.

Bien Historie,

C'est à dire lors qu'en vn Tableau reprefentant Histoire, tous les Corps qui la composent, sont bien leurs essets consormement à icelle, tant au general qu'au particulier.

Belle Expression,

Signifie, quand dans vn Tableau, les Figures ou autres Corps qui le composent, expriment bien leur effet, tant en leurs actions, Gestes ou autres mouuemens, qu'aux principales parties qui seruent à exprimer leurs passions; & ainsile mesme de tous les autres Corps suiuant leur Nature.

Vnion, ou Bien-Ensemble,

Peut estre attribué à deux égards, au Deffein, & au Colory ou maniere de Peindre, & c'est & c'est lors que dans vn Tableau tout est si bien en la place qu'il doit estre, qu'on n'y voit point de Contraste, & que les Couleurs claires & brunes, tant des Corps que des Airs qui les enuironnent, sont sortes & soibles, selon la proportion necessaire aux lieux & places conuenables; qui est en vn mot, saire s'il se peut, que l'œil aye ou reçoiue, la mesme vision ou sensation des Corps faits aux Tableaux, qu'il feroit de ceux du Naturel.

Noyé, Fondu, ou Perdu,

C'est lors que les Couleurs, tant des Iours, Teintes & Demies Teintes, & aussi des Ombres & Ombrages, sont bien alliées & meslées les vnes dans les autres, selon leurs endroits & places.

Teinte, & Demie Teinte,

Doitent estre entendus de la diminution de force, ou affoiblissement d'une Couleur à une autre, tant de celles qui sont Esclairées, que des Ombrées & Ombragées.

Groupe,

C'est lors qu'on voit dans vn Tableau, deux, trois, quatre, ou plusieurs Figures ou autres Corps ensemble.

Tenir du Fier & du Terrible,

S'attribue à des manieres de Desseigner & Peindre, dont les Figures ou autres Corps yant vie ou autrement, paroissent en leurs Regards, Ports & Actions, Fieres, Cruelles & Affreuses, ainst que cela se voit ordinairement en diuerses rondes Bosses & bas Reliess Antiques, & en plusieurs Tableaux, Desseins & Stampes de Iule Romain, & mesme en quelques vnes de Raphael d'Vrbin.

Artiste, & Croquée,

Ne signifie communement selon le dire de plusieurs personnes, qu'vne mesme chose, qui est, lors que le trauail du Pinceau & des Couleurs, paroist auoir esté conduit & applique auec grande facilité & prestement; en sorte que la superficie du Tableau, paroisse rude ou inegale, & l'ouurage comme non acheuée en la regardant de prés, principalement la maniere Croquée; Mais pour l'Artifte, on peut en faire cette distinction, puis que souuent & auec raison il se dit de plusieurs manieres bien acheuces ou finies, qu'elles sont Artistement Peintes, ou pour parler autrement, faites auec grand Art; & sur cela il en sera dit quelque chose dans le cinquiéme Chapitre.

Vaghezza,

C'est vn mot Italien qui ne veut quasi exprimer autre chose que ce qui a esté dit de l'vnion, ou bien d'vn Ouurage qui donne grand agréement à l'œil.

Seuelt,

S'entend, lors que des Figures ou Corps

& autres parties qui forment vn Tableau, paroissent d'une grandeur égayée, franche & libre, & le Colory surprenant & vif, ensemble le maniement du Pinceau, fort, libre & coulant.

Frais, & Tendre,

Ces mots portent affez leur fignification auec eux, sans en donnerautre explication.

Dur, & Sec,

C'est le contraire du Tendre & du Molet.

Coupé ou Tranché,

Est lors que les Contours des Corps principalement les Tournans, paroissent tranchez ou coupez net comme vn trait de plume, en lieu qu'ils doiuent estre suiuant l'occasson & la mariere aliez ou perdus auec la Couleur qui les touche ou enuironne.

Grand Iour, Grand Ombre,

Sont mots peu vsitez, toutefois je dis que c'est lors qu'on veut obseruer és Figures ou Corps de grandes parties Esclairées, Ombrées & Ombragées, afin de fraper l'œil d'abord, par

deux contraires opposez.

Il y a plusieurs autres termes que jelaisse sans en faire mention, crainte d'ennuyer le Lecteur, & mesme que je les tiens come pour inutils, puis qu'ils ne seruent de rien à la connoissance desdits Ouurages, & aussi que de jour à autre il s'en inuente de nouueaux, Il

ē ii

me suffita de dire pour sinir ce sommaire que mon dessein ne tend à autrebut, qu'à conuier ceux qui sont versez és circostances cy-deuat dites, de nous faire part des autres Sentimens qu'ils peuvent auoir sur ce sujet, asin de tant plus faire connoistre que la pratique de ce noble art de Peinture, doit estre sondée en la plus part de ses parties sur vn raisonnement droit & reglé, qui est à dire Geometric, & par consequent demonstratif.

Ceux qui liront ce petit Traitté sont aduertis, de prendre, s'il leur plaist, garde, au sonds & à la matiere qu'il contient, & non au Stile d'escrire, puis qu'à mon grand reregret, je n'ay aucun droict de m'en piquer.





LA DISTINCTION

DES

DIVERSES MANIERES de Desseigner & Peindre,

ET

DES ORIGINAVX
d'auec leurs Copies.

Ly a plusieurs choses qui m'ontobligé CLD ou donné enuie de faire ce petit Traitté: L'vne, que diuerses personnes m'ayant entendu dire mes Sentimens sur plusieurs ouurages de Peinture, touchant leur bonté, & de qui ils pouvoient estre, & mesme s'ils estoient Originaux ou Coppies, m'ont souvet enquis si lon pouvoit donner l'intelligence & connoissance de ces choses, à vne personne qui ne seroit point dans la pratique de cét Art. L'autre, dauoir ouy plusieurs sois declamer quelques Curieux de Tableaux, contre de tres excellents Praticiens les accusans d'ignorance en leur Art, à cause qu'ils ne rendoient pas témoignage de connoistre les diuerses

manieres desdits Tableaux, ny mesme les Originaux d'entre les Coppies, & que bien souvent ils en mesestimoient que lesdits Cu-

rieux estimoient beaucoup.

Dauantage, j'ay reconnu qu'il se trouue des hommes Curieux pour vn Temps, & dans vn autre Marchands & Negociateurs de Tableaux jusques à tel point, qu'aucuns taschent de faire passer de tres-mauuaises choses pour des bonnes, & des Coppies pour des Originaux: & aushily en a diuers autres qui apresauoir retenu & proferé quantité de Termes de l'art.comme, de l'Antique, du Raphael, du Grand, de la grande ou forte Maniere, du Bon ou mauuais Gouft, D'ordonnance, de Disposition, de bien Historie, de belle Groupe, du Fier, d'Expression, d'Vnion, de bien Ensemble, bien Touche ou Heurte, d'Arrifte, Corqué, de Vaghezza, Seuelt, Frais, Tendre, Dur, Coupe, Tranché, Noye, grand Iour, grand Ombre, Teinte, & demye Teinte, & plusieurs autres telles choses, s'imaginent qu'on les doit tenir pour tres entendus ou connoissans en icelle; & ce qui leur augmente encore dauantage cette bonne oppinion, c'est qu'ils ont quelquefois rencontré à connoistre quelques manieres de Peindre, ce qui est pourtant tres-peu de chose, dautant qu'il y en à de telles, qu'vn aueugle les pouroit discerner en les touchant, & mesme ils ont encore cela de tres-mauuais, soit par ignorance ou autrement, qu'ils mesprisent souuent l'ouurage de tels autheurs qui vaudra mieux que tous les Tableaux qu'ils ont. C'est

pourquoy, bien que je neme sois jamais fait de feste sur la connoissance de ces choses parmy beaucoup de tels Curieux, j'ay estimé pourtant qu'ils ne me pourroient tourner à blasme de leur en dire mon aduis, quoy que non conforme au leur; suppliant tous les Nobles, Honnestes, & Candides, Curieux, de croire que je les honore, respecte, & tiens pour les protecteurs & supports de ce noble Art, & souhaitant aux autres qui ont plus d'affection que de connoissance és Ouurages d'iceluy, autant d'intelligence & de lumiere qu'en peut auoit le plus excellent Praticien; & en fin à ceux qui ont la croyance d'en auoir, quoy que sans beaucoup de sujer, qu'elle leur soit oftée, afin qu'ils en profitent dauantage: Et requerant aussi des negocians vn peu interessez, qu'ils fassent leur trafic auec plus de droiture, tant pour leur bien que pour banir ce mot de manie, qu'on donne souvent à tort à plusieurs Curieux & connoissants desdits ouurages à leur occasion; Car c'est a tort qu'on repute à folie & foiblesse, d'estre amateur & connoissant de ce qui est beau & bon; Mais c'en est bienvne tres-grande, de juger de l'intention & pensée d'autruy, auant que d'en estre bien informé.

Mais pour reuenir à mon dessein, je dis qu'vne personne qui ignore la pratique de la Pourtraiture & Peinture, & ce qui est des particularitez cy-deuant deduites en gros, quand il entend dire qu'vn Peintre ou autre tel Connoissant qui n'aura iamais veu qu'vn

ou deux Tableaux d'vn autre Peintre, supposé qu'il n'eust point changé de maniere, discernera ceux qu'il fera en suitte pour en estre, quoy que differents; Et de plus s'il ya des Coppies faites sur iceux, sans auoir veu lesdits Originaux, il les reconnoistra tels, & aussi fera la distinction s'ils sont bien ou mal coppiez, ou s'ils sont retouchez par endroits de celuy qui a fait l'Original; A grand subjet de s'estonner, & de se persuader qu'il est comme impossible de connoistre ces choses, & encore plus qu'vne personne comme luy qui n'est pas dans la pratique de cét Art, puisse paruenir à quelque point de cette mesme Connoissance; Et toutesois je croy qu'vn Excellent praticien de bon sens, & doué de la qualité de bien s'exprimer, pourroit par la confrontation de deux ou trois Originaux de plusieurs Peintres, & d'autant de diuerses Coppies sur iceux, en donner de grandes instructions à ceux, qui quoy que non Praticiens, y auroient genie disposition & inclination, principalement pour la différence ou distinction des manieres, outre ce qui en sera dit dans ce Traitté, & aussi sçait-on bien qu'il y a quantité de personnes, & mesme de Condition, lesquels à force d'auoir veu pluficurs Tableaux d'vn mesme Autheur, & aussi frequenté & entretenu sur ce point diuers Praticiens, en reconnoissent les manieres & partie du reste.

Mais de bien distinguer auec ferme assurance, vne bonne Coppie d'yn Original abfent, & qui plus est, sans auoir iamais veu ledit Original, Cela est assez rare, & bien encore dauantage quand on n'a point veu de l'ouurage ou maniere du Peintre qui l'aura fait: le sçay bien que quelqu'vn pourroit faire quelques objections sur cette derniere particularité; mais il est supplié de differer jusques à ce qu'il ait rencontré l'endroit où elle sera amplement desduite, auec plusieurs autres, qui ne tiennent lieu en ce discours par

manière de dire, que d'Enonciation.

Et quant à ce que plusieurs personnes ont creu, que cette Connoissance & Curiosité estoit vne manie, & qu'il n'y auoit lieu d'y assoir aucune bonne resolution ou fondement, pour auoir veu quelque Curieux & Praticiens de cét Art, & non des moins Experts, qui prenoient quelquefois vne maniere pour vne autre & des Coppies pour des Originaux, je les aduertis en passant que cette mesprise ne doit pas donner lieu de conclurre de la sorte, d'autant que s'il y a quelques vns desdits Praticiens qui ne se sont point adonnez à tant esplucher ces particularitez, il s'en trouue d'autres qui s'y estant adonnez en ont acquis vne grande connoissance, & aussi comme j'ay dit des Curieux. Puis d'autres moins Experts qu'eux qui l'ont & d'autres qui ne l'ont pas.

Par ainsi lon peut dire qu'il y a en cela comme en d'autres Arts, de naturelles inclinations pour ces choses, puis que mesme ceux qui n'ont point de pratique, en ont ou peuuentauoir quelque connoissance; Mais de dire qu'elle soit approchante de celle qu'en peutauoir vn Excellent Praticien exercé en icelles, cela est impossible à mon aduis, qui sera en son lieu proposé plus au long.

Or comme cette matiere paroist d'ellemesme assez difficile, pour en pouvoir donner principalement par escrit quelque lumiere à ceux qui ne se sont point adonnez à la pratique de cet Art; Et que plusieurs personnes en pourroient bien tenir la pratique impossible, & meblasmer de l'auoir en quelque façon entrepris; je les prie si tant est qu'il y en ait, de ne croire point que je pretende par ce que j'en diray, d'en donner de si grandes clartez, que telles personnes sans pratique puillent connoistre & discerner toutes les diuerses manieres de ceux qui se sont meslez dela Pourtraiture & Peinture, & de plus sçauoir le mesme de tous les Originaux d'iceux d'auec leurs Coppies, soit que lesdits Originaux soient presents ou absents; Mais de se representer simplement, que j'entreprens seulement de desduire mes sentiments en gros, de ce qui fait que plusieurs tant Praticiens qu'autres, ont connoissince des manieres de diuers Peintres, & de plus, qu'ils distinguent ou reconnoissent de quelqu'vnes de ces manieres, les Originaux d'auec les Coppies, en les confrontant les vns aux autres, & ce qui est de plus subtil discerner les choses cy-denant alleguées.

Or on notera ce mot en Gros, à cause que

pour en venir au destail & pour bien expliquer, le rout il faudroit auoir presents des Tableaux Originaux & Coppies, & de plus vn bon Peintre entendu en ces particularitez, & vn bon Disciple pour comprendre ce qu'il luy en pourroit dire. Toutefois j'espere que ce que j'en diray ne sera pas tout à fait infructueux, quand mesme je ne serois que faire remarquer vne bonne partie des principales fautes que commettent les Copistes en imitant les Originaux; Et de plus monstrer en quelque sorte, qu'il est comme impossible qu'vn Coppiste tant bon soit-il, puille faire passer aux clairs-voyants, sa Coppie pour l'Original, principalement lors que ledit Originalluy est opposé ou present.

Et d'autant qu'il est assez ordinaire à pluplusieurs non Praticiens, d'alleguer qu'vn bon Peintre pourroit bien faire vne Coppie sur vn mauuais Original; A cela je respons, Qu'vn tel Peintre ne s'adonne pas d'ordinaire a Coppier des choses moindres que ce qu'il peut faire d'Inuention; Et supposé qu'il le voulust, cela se remarqueroit ou discerneroit aussi par les Clairs-voyans, & siau contraire il y adjoustoit du sien tant au dessein qu'au Colory, en ce cas, sa Coppie tiendroit en quelque sorte lieu d'Original de sa main.

Maisil est bon de dire vn mot sur ces deux noms ou natures d'Originaux & de Coppies,

& d'en faire icy vne distinction,

CHAP. I.

Ce qu'on peut entendre par Original & Copie.

LE tiens donc qu'à toute rigueur, lon ne peut donner ce tiltre d'Original qu'à vne chose delaquelle on ne puisse trouver le semblable dans la nature, ainsi qu'vn Tableau representant divers Corps & dont la forme ne soit connuë qu'à celuy qui la fair, car de faire la Representation ou Pourtrait d'vne chose connuë, quoy que naturelle, elle ne peut prendre que le nom de Coppie d'apres cette naturelle; Mais lors qu'on fera vne Coppie dudit Tableau, il se peut nommer

l'Original d'iceluy.

Et touchant ce que j'ay cy-dessus dit des Tableaux à qui je donne ce nom ou tiltre d'Originaux, c'est de ceux desquels les Figures & autres Corps dont ils sont composez ou sormez, sont tellement diversifiez tant en leur air, vestements, & autres dependances, qu'il ne puisse venir aucune Idec d'en auoir veu desemblables; ainsi ce sont de tels Desfeignateurs & Peintres, que je nomme Sçavants Originaux, qui outre qu'ils sçavent au besoin bien Coppier toutes les choses visibles dela nature, sçavent aussi les choses visibles dela nature, sçavent aussi les choses visibles dela nature de telles.

Car ainsi saisant, ils sont le mesme que les Historiens, & Poètes, lesquels quoy qu'ils ayent diuerses Histoires anciennes & moder-

nes, tant veritables que fabuleuses qui leur peuuent seruir desujet pour composer leurs cuures, nelaissent pas pour faire paroistre la viuacité de leur Esprit, d'en inuenter de telles, qu'on n'en ait iamais veu ny fait mention de semblables.

Ainsi vn tel Peintre, quoy qu'il ait toutes les choses visibles de la nature presentes à ses yeux, ou descrites & expliquées dans des liures, neantmoins il ne laisse pas pour faire paroistre la force de son imagination, &acquerir reputation, d'en inuenter & d'enformer d'autres, qui luy seront toutes particulieres.

Orafin de preparer l'esprit du Lecteur pour plus facilement entendre ce qui sera dit cyapres, j'ay trouué à propos (bien que ce ne foit pas icy mon principal dessein) d'expliquer icy en gros deux moyens de representer ainsi sur vne surface platte, toutes ces diuerses choses pour en composer ou faire vn Tableau; en remettant la deduction plus speciale sur la fin de ce petit Traitté, où le tout sera expliqué plus en destail que ce qui suit.



Deux diuers moyens connüs de Coppier ou Representer survne Surface Platte, nommée communement Tableau, les Corps visibles de la nature, Ensemble les Composez d'Inuention.

Le premier & plus vsité est en ayant deuant soy les Corps qu'on veut Coppier, ou bien leurs formes dans l'imagination, les Desseigner, Pourtraire ou Representer sur ladite Surface ou Tableau, sans autre regle ny mesure, que celle que l'œil & le jugement

luy en peuuent fournir.

Le second est, de faire ladite Representation ou Pourtrait de ces Corps , sur ladite Surface ou Tableau, par le moyen des mesures reglées, en sorte qu'on soit assuré que lesdits objets representez ainsi sur iceluy, facentàl'œil ou aux yeux de ceux qui les regarderont, la mesme sensation ou vision en toutes leurs parties, que leur feroiet lesdits Corps on objets visibles de la nature. & pareillement des choses qu'on peut auoir dans l'imagination en sachant les mesures. Or la regle de les representer ainsi, est ce qu'on appelle communement la Perspectine, mot qui ne signifie que ceux de Pourtrait, Pourtraiture, Representation, ou Tableau, sans laquelle vn Peintre ou autre tel Desseignateur, ne peut s'assu. rer du bon effet de son ouurage,

Ladite pratique de la Perspectiue ayant esté tenuë par cy deuant & non sans cause, du moins il y a bien du temps, pour tresdifficile, incomplette, & embrouillée, & sa pratique tres embarassée; auoit donné lieu à la plus grande partie des Praticiens, d'en rejetter au moins negliger la pratique. Mais à present elle est reduite à vne tres-grande facilité & entierement complette & deschargée des embarras d'vn nombre innombrable de Lignes, de sorte qu'vne personne qui n'auroit jamais apris à Desseigner ou Pourtraire, & qui auroit inclination à ces choses, peut en moins d'vn mois par vne heure de leçon à chacun jour, acquerir l'intelligence de representer en Pourtraiture ainsi par la regle, la plus grande partie des Corps qui sont composez de Lignes droites & courbes, tant celles qui se peuvent ou doivent faire par l'ayde du Compas que de quelques autres, ensemble de la raison des Ombres & Ombrages à toutes sortes de lumieres, & pareillement celle des Places, de la Force & Foiblesse des Touches teintes ou Couleurs.

De plus cette Regle donne le moyen de reconnoistre en voyant les diuers Tableaux, s'ils sont faits par icelle ou non, & de descouurir s'il y a des desfauts. Tout ce qui peut estre fascheux à cét égard, (si tel se doit nommer) est qu'alors qu'on a acquis cette Connoissance, plusieurs Tableaux dont lon a fait autresois grande estime ne semblent plus tels, parce qu'on y reconnoist tant de

visibles deffauts, & en si grand nombre, qu'on pert le desir de le dire, de peur d'encourir le blasme de ceux qui n'estans pas instruits en ces choses, croiroient qu'on diroit cela sans fondement; Mais la satisfaction que lon a à part foy, & celle de se faire entendreaux personnes qui possedent ces regles, & de plus qu'on se trouue en quelquesorte aucunement assuré de ne faire point acquisition à moins que de volonté, des ouurages qui pourroient estre en quelque sorte trop desectueux suplée à tout cela. Ce n'est pas pourtant qu'il faille absolument & à la rigueur, examiner ainst tous les Tableaux, & rejetter ceux où il y auroit quelques vns de ces defauts; Carle nombre des mauuais excederoit celuy des bons, dautant qu'il y en a bien peu traittez de cette sorte, & mesme que tel ouurage qui auroit quelques vnes ou mesme plusieurs de ces fautes, pourroit auoir en d'autres parties de belles & bonnes qualitez; comme d'estre bien correctement desseigné & par regle, & au contraire les Iours & Ombres auec leurs Affoiblissemens mal traitez & contrela regle, & ainsi de dinerses autres choses, & partant ne deuroit pas estre mesprise, ains estimé en ce qui pourroit y auoir de bon.

De plus cette pratique ou regle passablement entendue, instruit ou donne la connoissance lors qu'on desire faire faire quelques Tableaux en diuers lieux, de les y bien placer & auec raison, en sorte qu'ils facent yn bel & agreable esset aux yeux de ceux qui les regarderont; Et pour ce faire à la fin de ce Traitté j'en ay fait vne Planche pour mieux

m'en expliquer.

Mais je trouue qu'il est temps de reuenir à mon premier & principal sujet, qui est de faire voir ou connoistre, comme il se peut rencontrer que de plusieurs Excellents Peintres, les vns autont connoissance de ces diuerses manieres cy-deuant deduites, & aussi de ces distinctions d'Originaux & de Copies; Et d'autres ne l'auront pas ou du moins elle sera bien petite.

Que le mesme se rencontrera dans vn grand nombre de bons Copistes, & sinalement en plusieurs non Praticiens, les vns desquels auront inclination à ces curiositez &

distinctions, & les autres non.

Or comme j'ay distingué parmy plusieurs excellens Peintres Originaux des diuers sentimens sur cela, & pareillement és bons Copistes & aux Curieux non Praticiens, je tascheray pour aucunement m'expliquer, d'en introduire quelques vns, deduisans les vns apres les aurtes, vne partie des leurs, du moins en gros, puis en suitte je donneray le mien vn peu plusamplement, & diray lequel d'icceux je croy deuoir auoir plus de connoissance de ces curiositez; & pour conclusion j'exposeray l'opinion que j'ay, de ce qui peut estre enseigné desdites choses à vne personne qui n'en a aucune pratique, & qui a disposition & desir de les sçauoir.

CHAP. II.

Raisons des Peintres qui ne se sont point adonnez à reconnoistre les diuerses manieres des Peintres, ny à discerner les Originaux d'auec leurs Copies.

ILs disent qu'ils ont choisi d'abord pour tascher de se rendre promptement sçauants en cet Art, vne seule maniere qu'ils ont creiie bonne, & de laquelle ils ne se sont point voulu departir, ny mesme en considerer aucune autre, de peur qu'elles fussent prejudiciables à leur dessein, & que s'ils n'auoient reconnu en celle dont ils ont fait election, plusieurs belles parties qu'ils n'ont point veues telles en diuers Corps visibles de la Nature, ils ne l'auroient pas choisie, n'ayant amour & nefaisant estat que de la belle nature, & de plus qu'ils ne pretendent point d'estimer aucun Tableau ny autres telles choses de cét Art, que par la bonté qu'ils reconnoissent en eux, & qu'ils croyent que la plus part de ce qui cause ces diuerses manieres est vn deffaut en l'ouurage, puis qu'vn bon œil ne discerne point ainsi, toutes ces diuersitez au Naturel.

Raisons des Peintres qui se sont adonnez à connoistre les dites manieres & à discerner les Originaux d'auec leurs Copies.

CEux-cy disent, que dans leurs commencements, ils ont Copié diuers Tableaux & de plusieurs Peintres, & que toutes ces manieres leur ont beaucoup ouuert l'esprit & aydé à se persectionner, & à s'en acquerir vne qu'ils croyent bonne & laquelle leur est en quelque sorte particuliere, & aussi donné en diuerses rencontres de tres-grandes fatissactions, soit en leur faisant reconnoistre d'autres Tableaux des mesmes Autheurs, qu'ils n'auroient jamais veus pour estre de leurs manieres, soit en leur saisant discerner leurs Originaux d'auec leurs Copies, soit de plus en leur facilitant le moyen d'en donner quelques lumieres & connoissances à diuerses personnes Curieuses de tels Ouurages.

Raisons des Copistes qui ne se sont point adonnez à reconnoistre ces diuerses manieres, ny à discerner lesdits Originaux des Copies.

CES Copistes disent aussi qu'ils sont assez empeschez d'acquerir le moyen d'imiter bien leurs Originaux tant aux Traits ou Contours, qu'en leurs Coloris & Maniement du Pinceau & application des Couleurs; Et de plus descouurir ou reconnoistre celles qui y sont entrées, afin que soit qu'ils imitent vn Tableau frais fait, ou fort ancien, les Couleurs dont ils se seruiront estant seiches, se puissent conserver long temps de la mesme Teinte ou Couleur que leur Original, Et plusieurs autres sujettions requises, sans s'amuser à telles recherches & curiositez; & qu'ils desireroient que toutes ces diuerses manieres, sussent converties en vue seule, afin d'en acquerir tant plustost le moyen de les bien Copier ou imiter.

Raisons des Copistes qui se sont adonnez à reconnoistre ces diuerses manieres, & à discerner les Originaux des Copies.

CEux-cy tiennent, que le grand nombre des Copies qu'ils ont faites sur quantité de bons Originaux de diuers Peintres, a seruy à leur ouurir l'esprit à des choses qu'ils n'auroient pas acquises en ne Copiant que sur vne seule maniere, & à les rendre bien versez & rompus dans la pratique, tant sur les manieres Finies que Croquées ou Artistement Touchées, pour la liberté & maniment du Pinceau, & à leur donner lieu d'en distinguer les manieres, & mesme quantité d'Originaux d'auec leurs Copies, & par ce

moyen à rendre sernice à plusieurs honnestes gens, au choix & discernement de diuers bons Tableaux Originaux.

Raisons des Curieux non Praticiens qui n'ont aucune connoissance de ces manieres, ny desdits Originaux & Copies.

Ette sorte de Curieux declarent, qu'ils ayment les Tableaux pour les voir & seruir d'ornemens chez eux; Mais que de sçauoir & connoistre la maniere & le nom de ceux qui les ont faits, & s'ils sont Originaux ou Copies, c'est jusques à present une pas-sion qui ne les touche point; Et mesme qu'ils croyent comme impossible de pouuoir acquerir la pratique de cette connoissance, Et que ce qui les y confirme dauantage est, d'auoir sceu que plusieurs Curieux non Praticiens se disans l'auoir, auoient esté souvent trompez en l'acquisition de plusieurs Tableaux.

Raisons des Curieux non Praticiens qui se sont portez és connoissances desdites manieres & distin-Etions d'Originaux & Copies.

CEs Curieux-cy trouuent que ce seroit vne curiosité tres-imparfaite, d'auoir

des Tableaux & ne sçauoir s'ils sont bons ou mauuais, ny qui les peut auoir faits, & qu'il n'y a guere d'affurance defaire acheter de telles choses par autruy, si lon le peut faire soymesme, à cause qu'il y a des Curieux soy disants connoissants en icelles & mesme des Praticiens qui s'y sont souuent trompez, sans y comprendre ceux qui se messent de tromper les autres; de plus qu'il arriue d'ordinaire dans leurs commencements de curiolité desdits Tableaux, qu'ils les choisssent ou font choisir, par des personnes qui n'y ont souuent guere plus de connoissances qu'eux; de sorte qu'en estant aduertis, ils prennent resolution de s'en deffaire pour en auoir de meilleurs, desquelsil enarriue bien souuent la mesme chose,

Or tout ce que dessus ils ne le disent point seulement des autres, mais aussi d'eux-mes-mes qui ne l'ont que trop experimenté; Ce qui leur a donné lieu de s'instruire en quelque saçon sur ces connoissances, & desaire election d'vn squant Praticien connoissant, & de plus honneste homme, a sin qu'il puisse sur pur le seulement et election d'vn squant Praticien connoissant, & de plus honneste homme, a sin qu'il puisse sur pur l'eux occasions où la connoissance de telles choses passe leurs portées: Mais ce de telles choses passe leurs portées: Mais croyent que la connoissance bien qu'en partie seulement, de la beauté & bonté desdits Tableaux, donne bien plus de contentement; que celle de n'auoir que l'agrement à la veuë, par l'éclat d'vn nombre de belles Couleurs.

Ayant ainsi representé les raisons de tous

ces Praticiens & Curieux, je suiuray l'ordre que j'ay cy-deuant dit, d'estendre assez au long & par le menu mes sentimens sur iceux, assu de tascher à faire connoistre sur quoy chacun d'eux se sonde, & aussi donner quelque lumiere du dessein que j'ay qu'on puisse tirer quelque legere connoissance de ces particularitez.

CHAP. III.

Sentiments fur chaque raifon des precedens Praticiens & Curieux; Principalement des deux bons Pcintres & du dernier Curieux.

L's rencontre des Peintres, qui de volonté deliberée estans sortis de leurs premiers preceptes de l'Art de la Pourtraiture & Peinture, s'attachent d'ordinaire à quelques vnes des manieres de diuers Peintres, dont les ouurages ont reputation, & s'y tiennent si inuiolablement attachez, qu'ils ne l'abandonnent point qu'ils ne s'en soient saite vne, laquelle quoy qu'elle ne leur soit entierement semblable, neantmoins elle en tiendra beaucoup.

D'autres, se portent de pareille affection à imiter le naturel, & de telle sorte, qu'ils ne considerent pas bien souuent qu'il est tres-deffectueux & mal proportionné, & ainsi le Copient tel qu'il est, ou qu'ils le voyent,

Sans y adjouster ou diminuer,

Il y en a auffi qui , soit par leur propre connoissance, soit qu'ils en ayent esté aduertis, scauent d'vne bonne partie faire dictinction des desfauts qui se trouvent en divers Corps visibles de la nature, & quantité d'autres obseruations, & se sentans trop peu Sçauants pour remedier à ces choses, recherchent dans les Ouurages Modernes ou de l'Antiquité, si aucun Artisan de cet Art, n'y a point suppléé; Cela estant ils le choisissent pour leur seruir comme de Principe, Baze, Modelle, ou Fondement, & ainsi s'y attacheront sans vouloir en considerer d'autres: Puis estans arriuez au point, que leurs Ouurages approchent beaucoup de ceux qu'ils ont ainsi pris ou choisis pour Modelles, ils s'efforcent de pouvoir descouurir quel a esté le but ou Fondement, de celuy ou ceux qui les ont faits, & s'ils trouuent qu'vne partie ait esté faite par l'ayde des vestiges & fragments de ces Excellents Statuaires ou Sculpteurs, & Architectes Anciens, pour le bel air & proportion, Vestemens, Edifices, Meubles & autres dependances d'iceux, ils les considereront & desseigneront tant & tant de fois, qu'ils en auront l'imagination remplie; De sorte que venans à former quelques Ouurages de leur Caprice ou Invention, & melme se seruans du naturel, ce qu'ils produiront tiendra de l'air & de la proportion de ces bel. les choses; Car trouuant du deffectueux audit Naturel ils le corrigeront : Cecy soit dit pour le Trait & Contour de la proportion des

Corps, Car pour la maniere de Peindre, Colorer, Fortifier, ou Affoiblir, les Ombres & Ombrages, Teintes & demie Teintes, qui seruent à faire ou former le Relief des Corps, & leur donner leur Colory necessaire, lon n'en voit point és vestiges des Anciens dont lon soit bien certain; Les matieres sur quoy on les fait, & qui seruent à les faire, n'estant de nature à resister aux temps & à ces injures, & aussi à la brutalité & enuie des hommes, ainsi que les Marbres & les Bronzes; Toutesois lon tient que ce qui est peint à Fraisq à Rome en la vigne du Cardinal Aldobrandin representant un Mariagé, est Antique; Ledit Ouurage a este Desseigne on Copie par P. de Cortonne, Eg Graue à l'Este Forte en trois Planches, par un nommé B. Cupitelle.

Il y a comme j'ay dit des Peintres, qui s'attachent de cette forte à quelque maniere que ce foit, ne confiderant pas quas les autres; Ainsi par consequentiln'y a pas grande apparence de croire qu'ils ayent vne grande connoissance de tant de diuerses manieres, & qu'ils puissent juger si elles sont Originales ou Copies, à moins que ce soit de celles qu'ils ont prises ou choisses, Mais bien vous sçauront-ils dire leur Opinion, si les dites choses sont bien ou mal proportionnées & traittées suiuant leurs Gousts ou la maniere qu'ils

affectent.

Et dautant que l'enuie pourroit prendre icy à quelqu'vn, d'auoir le Sentiment des Sçauants Peintres sur la distinction de ces manieres, & laquelle ils tiennent pour la meilleure; Ieles auertis que jetascheray d'en deduire quelque chose apres que j'auray siny le mien; sur les raisons cy-deuant dites, ainsi que je viens de faire sur celles des Peintres qui ne se sont point adonnez à la curiosité & distinction desdites manieres & des Originaux & Copies, puis que cela fait partie d'iceux Sentimens.

Maintenant touchant ceux qui s'y font versez ou adonnez.

C Eux qui ont vn peu Pratiqué cét Arr & conuerse auec plusieurs qui s'en messent, sçauent que la plus part qui en commencent la pratique, soit de leur mouuement, soit par l'aduis ou solicitation de quelqu'vn, en font d'ordinaire eslection d'vne qui ne sera pas trop excellente, & la pratiqueront ou Imiteront jusques à ce qu'ils croyent en auoir rencontré vne meilleure, & ainsi en vne grande quatité de temps font plusieurs de tels changemens, non sans sçauoir le nom des autheurs de ses manieres; Puis en suite estant en quelque sorte las de tant changer, & accoutumez à ces diuerses essections ou choix, ils se contentent d'y faire reflection, & de considerer en toutes les autres, des particularités qui les contentent, & ainsi à force de faire tant de temps, de telles observatios, il s'en feront vne, laquelle tiendra en quelque sorte d'vne bonne partie de ceux qu'ils ont veuë, & qui leurs viennent plus a gré ; Ainsi je trouue que ceux qui s'auacent de la sorte dans la Pratique de cét Art de Peinture, & qui sont douez d'vneforte imaginatióà bien y faire retenir & reuenir aux occasions toutes ces diuerses manieres, peuuent par ce moyen discerner les autres Tableaux qui serot faits par les mesmes autheurs d'icelles, quoy qu'ils ne les eussent jamais veus; Et connoistre s'ils sont Originaux ou Copies, principalement quand de tels Praticiens ont acquis en cet Art, le don de faire leurs ouurages deleur genie; Il est bien vray qu'ils pourront auoir vne Connoissance de toutes ces distinctions, plus forte sur vne maniere que sur vne autre, puis qu'ils peuuen. a l'vne d'elle auoir plus ou moins d'inclination; Mais comme ils ont grande disposition & bien souuent occasion d'exercer cette connoissance, tant pour leur Curiosité que pour celles de beaucoup d'autres, ils s'y exercent dauatage, & par ce moyen plusieurs s'y rédent tres-experts lesquels souvent ne denient pas aux honnestes gens Curieux de Peinture ou Tableaux, de leur apprendre quelques vnes de ces particularitez, & de les seruir à l'occasion lors qu'ils veulent faire acquisition de tels ouurages.

Pour les deux Copistes, je ne trouue pas qu'il y ait lieu de m'estendre beaucoup sur les raisons qu'ils pourroient alleguer outre celles de cy-deuant, dautant que hors l'inuention que je suppose estre l'auentage que ces deux precedens sortes de Peintres ont sur iceux ce ne seroit que les mesmes, & aussi que chacun sçait qu'il faut que lesdits Peintres Originaux ayent esté Copistes des œuures des autres, auant que d'en estre venus à ce degré; quoiqu'il se pourroit rencontrer qu'vn Copiste qui se seroit tousiours adonné à Copier, sçauroit plus de particularitez qu'vn autre qui s'y seroit moins porté, mais neantmoins je croy que le sçauoir de l'Original Peintre l'emporte sur tout cela; Reste seulementà dire, que le Coppiste qui a eu l'intention des atacher à telles circostances, & quia l'imagination aucunement forte pour retenir quelques idées de ces choses, peut estre en quelque sorte capable d'en donner des preceptes és occasions.

Pour les deux Curieux non Praticiens, qui absolument determinet de volonté deliberée de ne se point soucier de discerner les choses cy-deuant dittes, & qui n'ont desir que de se satisfaire; le trouue qu'on n'y doit trouuer à redire; Et qu'au contraire il est comme à propos qu'il y en ait de tels, afin que les Praticiens qui ne sont pas encore assez sçauants, trouvent le debit de leurs œuures d'aprentisfage, & ainfile mesme des autres Curieux & Peintres, suivat les divers Gousts ou manieres, Mais si lesdits Curieux vouloient faire passer leurs Tableaux pour tres-beaux & bons, l'on n'est pas obligé de les croire; non plus que de tenir impossible qu'vne personne qui n'est point dans la pratique de la Peinture, ne puisse puisse pouvoir acquerir aucune lumiere de ces choses.

Les Curieux qui estiment la connoissance d'icelles leur estre necessaire tant pour leur satisfaction que par obligation, ont à mon aduis juste raison, principallement lors qu'il s'agist de vouloir employer de grandes somes de deniers en l'achapt de telles choses, & ainsi attirer chez eux par le renom d'icelles, les vrais Curieux & sçauants Praticiens de tels Ouurages, afin qu'ils reçoiuent la satisfaction qu'ils attendent d'eux, de voir, reconnoistre & estimer leursdites curiositez comme elles le meritent: Car il ne se faut point flater en ces choses, ainsi que diuers autres Curieux qui auront mille differents Tableaux, & d'vn grand nombre de Peintres, dont la plus grade partie est fort peu de chose & ne peut estre estimée que par eux ou autres coiffez d'vne semblable marotte ; Et qui s'il auient que ceux qui sont connoissants ne les estiment, ne se trouuans assez Complaisants pour cefaire, les qualifieront aussi tost d'ignorance, sans songer ou penser que cette qualité leur appartient plustost qu'à eux, puis qu'ils voyent Souvent de tels Curieux qui font de leurs cabinets de Tableaux, comme des habits, & de diuers emmeublements selon la mode; Ce n'est pas pourtant qu'il ne s'en rencontre de l'humeur de ces vieillards critiques ou fantasques, lesquels ne trouuent ny bons ny beaux les nouueaux escrits ny les nouuelles modes d'habits, & qui pour le tesmoigner se

font paroistre ridicules, & par leurs discours, & par cette obstination de ne point changer de mode.

De mesme se trouue il de tels Curieux de vieux Tableaux, dont la plus grande partie est si peu de chose aux yeux des connoissans, qu'à peine les peut on regarder; Toutessois ces Messieurs ont vne telle passion pour eux, qu'ils tiennent tous les Modernes tels qu'ils soient, mille sois au dessous; & tout au contraire les sçauants Peintres presereroient l'vn desdits Modernes, à vne infinité de tels Anciens; Et il saut que j'auouë, que je me suis souuent trouué alsez empesché par respect ou autrement, de dire messientimens sur de tels

Ouurages.

Ie sçay bien que plusieurs diront que chacun à son goust, & c'est ce que j'auouë, mais je croy aussi que celuy qui est le mieux receu & reconnu des Sçauants en cét Art, doit estre tenu pour le meilleur, principalement quand on ne peut pas dire que dans le Temps qu'on fait ce discernement, lon soit priué d'excellens hommes ainsi qu'en celuy-cy, duquel le grand nombre a fair, que la connoissance & curiosité de ces choses, a augmenté au point que les plus excellens Ouurages de Peinture, qui n'estoient tenus pour tels que de peu de personnes, le sont à present de la plus grande partie, & que ce qui ne venoit que tres- rarement à la connoissance de peu de Praticiens assez auancez, commence à present de ce faire connoistre & gouster aux petits Disciples, qui est ce grand Goust cy-deuant dit, pris ou tiré des beaux Antiques, & de Raphaël d'Yrbin, Iules Romain & autres, sur les manietes desquels je m'estendray icy de suite le trou-uant à propos, pour faire voir aux Curieux & autres, que la connoissance que les excessens. Praticiens ont de ses choses à coparaison des autres Manieres, est sondée sur quelque sorte de raison, & ne doit pas estre appellée vne manie; le sçay bien que cette Verité ains ingenuement dite, pourra déplaire à quelques vns desdits Interesses, mais l'approbation des Sçauants & des Curieux raisonnables me suffit.

l'ay donc trouué à propos auant que de m'expliquer de quelques Remarques que j'ay faites touchant les Distinctions des Manieres & des Originaux & Copies, de dire mon sentiment de quelques Affectations de celles de plusieurs Peintres, & ce quia mon aduis a esté la cause qu'on y a glosé à comparaison de quelques autres; Et deuant que ce faire, je supplie derechef le Lecteur, de ne m'imputer que j'aye dessein d'offenser parsonne, ou d'en vouloir en aucune façon ternir la memoire, estant par la grace de Diev trescloigné de cette pensée, ou estre de l'humeur de plusieurs qui declament & ergottent de propos deliberé contre la Verité, & qui desors qu'ils sçauet celuy-cy est Peintre, ou Graueur, ou bien d'vne telle autre profession, disent qu'il ne peut ny ne doit raisonner que d'icelle, sans faire reflection, que toutes personnes qui pratiquent vn art qui oblige à représenter de toutes sortes de Corps visibles de la nature, soit de relief ou de platte Peinture, Dessein, & Graueure, doiuent sçauoir la mesure & la forme de ces choses, à moins que de n'estre pas tenus pour entendus en leur Art: Cecy soit dit en passant & pour cause, quoy qu'à ceux qui raisonnent de la sorte, il ne faudroit point prester l'oreille, si dauenture on ne reconnoissoit, que ce qu'ils disent sus

plustost ignorance que malice. Ie croy que plusieurs Peintres, qui dans leur temps ont acquis reputation par leurs Ouurages, nel'auroient euë telle en celuy-cy; C'est pour quoy puis qu'ils n'ont pas eu les yeux ouuerts pour prendre le bon chemin, faut tascher de ne tomber point en de pareilles fautes si faire se peut, afin du moins que si ce n'est la volonté de Dieu de nous donner le temps necessaire pour acheuer nostre dessein, que nous puissions rendre compteà ceux qui viendront apres nous, que du moins nous auions pris le bon chemin pour ce faire, & ainsi que les œuures que nous laisserons, quoy qu'imparfaites, tiennent tousiours du bon, afin que ceux qui s'en seruiront pour estudier, ne tombent en de

trop grandes Erreurs.
Il y a eu des Peintres & Desseignateurs qui ont assecté de telles manieres au trait Cotour action & proportion des figures humaines qu'ils representoient, qu'on diroit à voir vne partie de leurs Ouurages, soit en Peinture, soi

en Taille-Douce, qu'ils auoient pris à tasche d'en composer de Nouvelles, & d'vne forme tres-bizarre & dont de quelqu'vnes les actios paroissent comme de personnes entreprises de tous leurs membres, par Crampes, Detorces, & Roidissements extaordinaires; Et pour en voir quelques exemples, cela se peut, en diuerses œuures de Spranger, Goltius, Bellange, & de plusieurs autres, le mesme faisoient-ils au Colory, le composant souuent d'vn tel variement de Couleurs, que la Carnation, tant en ses jours, Teintes, demye Teintes, Ombres & Ombrages, & le grand nombre de reflexions fortes representoient plustost à l'œil vn Colory d'Agatte ou autres Pierres de diuerses couleurs, que de la chair; Ce qui soit pourtant dit sans saire tort à leur memoire, car de la pluspart d'iceux & principalement Goltius, lon a remarqué en leurs dernieres œuures, qu'ils se corrigeoient de ces defauts, y estans tombez dans leurs commencemens en croyant bien faire, & donner grande gayeté & action à leurs figures, & en leur Colory grand esclat ou brillement de Couleurs.

D'autres ont fait des Ouurages où il n'y auoit pas de telles mesprises, du moins si grandes, ny si prejudiciables à les imiter, tastaschans de Desseigner autant justement & precisement qu'ils pouuoient les Contours & les Actions de leurs modelles ou sigures, suiuant qu'ils les auoient presentes à leurs yeux, sans se soucier beaucoup s'il ne s'en pou-

uoit rencontrer de mieux proportionnées ou agreables à l'œil, & si leur air & les actions qui leur faisoient faire, estoient conuenables à ce à quoy ils les destinoient, & pour ce qui est de leur Colory n'en croyans pas necessaire la precision si exacte, mais se contentant d'en faire ou representer quelque chose en gros, sans s'amuser à bien alier, noyer, fondre, ou perdre ensemble, affoiblir & fortifier auecraison, toutes les diuerses Couleurs, Teintes, Ombres & Ombrages, afin d'en exprimer bien le relief en toutes ses parties; Mais au contraire ayans affection de Peindre d'vne maniere Croquée & non finie, & ou quasi tous les coups de Pinceau paroissent en quelque façon separez les vns des autres, ce qui se nomme communemet Peindre artistement; Or sur cela je n'ay rien à dire, si l'intention d'vn tel Peintre a esté d'en vser de la sorte, comme il arriue assez souuent lors qu'on veut faire vn exquisse, Ordonnance ou premier Esbauche d'vn Tableau, sinon qu'il voulust faire passer ses œuures pour estre en toutes leurs parties & depedaces bien executées, & representant ce qu'elles doinent; Car en ce cas il n'y a pas lieu d'en demeurer d'accord, quand mesme il n'y auroit que cecy, à sçauoir qu'il est impossible qu'vne maniere de Peindreartiste ou Croquée, fasse à l'œil de ceux qui la regarderont, l'essect que luy seroit le naturel ain si present ; Ains au contraire, tous ces coups de Pinceau, & de plus les rehauts sur les jours, & les Teintes, Ombres &

Ombrages, ne luy representeront ques de taches claires & brunes, comme vn Ouurage de Marquetterie ou de Molaïque; Et c'est ce qui fait que ceux qui ne sont entendus ny connoissans à faire ces distinctions en tels Ouurages, n'ont pas satisfaction d'iceux en les voyant, & qui leur fait souuet dire, principalement sur les Pourtraits, que ces rehauts sont des taches blanches, & les Teintes & demye Teintes des meurtrisseures, & les Ombres & Ombrages des barboüilleures; Et pour témoigner que cela proniet du defaut del'Ouurage, il n'y a qu'à voir si celuy à qui ces choses font cét effect à l'œil, en dira le mesme lors qu'on luy montrera le naturel en la mesme position; ains au contraire, je croy qu'il distinguera bien, que ce sont des jours ou esclats de la lumiere, &les autres des Ombres & Ombrages.

Il y a eu, & encore y a t'il des Peintres en tres-grand nombre, qui ont éuité & éuitent grande partie de ces dessauts en leurs manieres de peindre, & en telle saçon que ceux qui n'ont point de connoissance en cét Art y trouueront grande satissaction & Agreément; comme entr'autres és œuures du Tirian & autres de son temps, mais d'y vouloir trouuer la mesme proportion, l'air, la forme & agencement des Draperies, & autres dependances des corps qui composent leurs Tableaux, à celle des belles sigures Antiques, & de Raphaël d'Vrbin, Iules Romain, & diuers de ce Goust, Ceux qui ont connoissance declarent ouuertement que cela ne se peut;

Ce qui ne doit pas toutesois donner lieu de les condamner ou mespriser s'ils n'en ont vsé de la sorte, car il y a apparence qu'ils n'ont pas eu cette lumiere; Cela seroit bon si en l'ayant, ils l'eussent voulu rejetter ou blassner sans y raisonner, ainsi que sont ordinairement ceux qui abondent trop en leur sens, & qui ne trouuent ny beau ny bon que ce qui vient d'eux; Mais la beauté de leurs Ouurages tesmoigne bien l'essort qu'ils ont sait, pour venir ou arriuer à vne grande persection, car hors ou sors ce grand Goust de l'Antique, ils

en ont fait de merueilleuses,

Dauantage plusieurs Excellents Peintres, quoy qu'ils n'ayent entierement eu la connoissance de ce qu'on appelle forte ou grande maniere, où ce grand Goust de l'air & proportion des beaux Antiques, ont fait des Ouurages qui peuuent passer en quelques particularitez au delà de celles des Peintres cy-deuant nommez, principalement quand ils ont choisi dans la nature & dans leur imagination, les plus belles Figures humaines & mieux proportionnées qu'ils auoient peu, ainsi qu'ont fait les Carraces entr'autres principalement Annibal, duquel on voit entre diverses Tailles Douces ou Stampes àl'eau forte, vne d'vne Aumoine de Sainet Roc, & vne petite Descente de Croix qui veritablement meritent d'estre estimées, & de plus austifa maniere de Peindre, laquelle est à mes yeux extremement franche, pleine & libre, faisant expression d'une chair ferme, mais non

à la verité si rendre, fraiche, vermeille & de?

licate, que celle du Titian.

Mais de tous ceux qui ont bien imité vne partie des proportions des beaux Fragments des Sculpteurs Antiques, & bien sceu s'en seruir és occasions, en les messant gracieusement & par grand Art auec le Goust qu'ils auoient, je n'en vois point de Comparable à Raphael Durbin, ny aucun Ouurage qui soit en cela pareil aux siens, principalement de ses derniers, pour y trouuer tout si complet & fait auec tant de jugement & d'Art; Car on trouuera dans plusieurs de ses Tableaux de Merueilleuses Ordonnances, Situations, & Dispositions des Corps qui les composent, & de grandes Variations d'air, de Figures, & d'admirables Expressions suiuant les sujets & occasions; Bref vne Vie, & tout tellement Arresté & Correct, qu'il est comme impossible de pouvoir arriver à faire mieux: Outre les Tableaux qu'on voit de luy il y a vn grand nombre de Tailles Douces, tant au burin qu'à l'eau forte, faites d'apres ses Tableaux & Desseins, dont les meilleures & plus estimées sont celles qui sont grauées au burin par Marc Anthoine, entre autres, Le Iugement de Paris, les Innocens, la Madelaine chez Simon, la Presentation de la Vierge au Temple, vne Vierge martyrisée dans une chaudiere d'huile, qui est Saincte Felicite, & pour de grandes Histoires de nobles Ordonnances, Le mont de Pernasse, vne Bataille grauée par C. Cort, l'Echole d'Athenes, & la dispute sur le Sacrement, grauce

par Georges Montouan & autres.

Ie sçay que quelqu'vn dira, qu'il ne discerne pas en sa maniere de Colorer de si grandes Tendresses & Expressions de delicatesse de chair, qu'en celles de plusieurs Excellents Coloristes, Toutefois si je ne me trompe, je croy qu'il y a aussi bien vne forte maniere ou bon Goust de Colorer, qu'vne de la proportion, & comme il se remarque des Alterations & differences és proportions & en l'air de plusieurs Figures viuantes de diuers païs; & que les Anciens Sculpteurs ont eu égard à ces choses, en recherchant d'en faire qui fussent entierement composées ou formées de toutes belles parties: de mesme il se peut aussi faire qu'il y peut auoir vne belle vigueur & proportion de Colory, puis que mesmeil nous apparoist assez ordinairement par les diuerses Nations, comme aux pais froids, que l'vn en sa proportion paroist soible, & que la couleur de sa chair en demontre aussi la mesme chose, & qu'au contraire il se rencontrera qu'vn d'vn autre païs chaut, paroistra fort & vigoureux en toutes ses parties, & parcillement en son Colory. Mais cela estant vn abysme sans fonds & vne Estude pour vn plus fort & vif esprit que le mien, je me contenteray seulement de dire pour le present, que nostre Siecle a produit des personnes si sçauantes en ces choses, & mesme de nostre Nation, qu'on doit esperer, si noftre Monarque daigne yn jour regarder cet

Att d'vn ceil fauorable, & en suitte les Nobles Amateurs d'iceluy, que la France produira plusieurs Raphaels, puis que mesme dés à present nous en voyons de grands rejettons, quoy que dans vn temps tres calamiteux & bien contraire aux Atts de telle Nature; & notamment en la personne du Rare N. Poussin, de present à Rome, lequel selon mon sens a fait & principalement depuis quelque nombre d'années, des Ouurages admirables, & dont vne partie est de present en cette ville, lesquels ont attiré sur elles auec tres juste raison, l'approbation de tous les Excellens Peintres, laquelle suffit pour conclutre la bonté & beauté extraordinaire

qui sont en eux.

Et dautant que plusieurs Curieux & Praticiens, ne sont pas encore de ce sentiment, je diray bien cecy en pallant, que n'estans point preocupez ny interessez, & qu'on leur puisse ouurir les yeux pour en connoistre quelques particularitez du moins en gros, ils en demeureront d'accord, & si ce n'està present, ce pourra estre quelque jour; puis que les Ouurages dudit Sieur sont faits par vne regle continuelle & raisonnement d'yn bout à autre; Qui est en vn mot le moyen de parler auec certitude d'vne chose, afin denel'estimer point par le recit d'autruy, ny à cause qu'elle est d'vn tel, ou d'vn tel, mais auec connoisfance de cause. Ainsi voila à mon aduis le sentiment de ceux qui n'affectent point de manieres à l'exclusion des autres que celle

qui peut resister à de telles Espreuues.

Or pour conclusion de ces choses, & pour derechef m'en expliquer afin qu'on ne m'imputerien de contraire à ce que j'ay eu intention de dire; le declare que je n'entens blasmer aucun de ceux qui ont curiosité ou aftection à quelque maniere de Peindre quelle qu'elle soit, ains au contraire je les estime tous comme les Supports & Protecteurs de ce bel Art; ny mesme les Praticiens, mais bien crois-je qu'ils sont obligez d'estimer chacune desdites choses, selon la perfection qui se trouue en elles; Car qu'vn Tableau ait esté composé de quelques parties que ce soit des choses visibles de la Nature, & d'vn tel ou d'vn tel païs ou climat, pourueu qu'elles soiet bien imitées ou qu'elles representet bien leur Original, ledit Tableau doit estre estimé; Et si les mesmes choses sont faites par diuers Peintres, & les vnes meilleures que les autres, chacune doit sans contreditauoir son degré d'estime.

Et à cause que plusieuts sont distinction, & ont plus de Goust à la Proportion, Forme & Colory de toutes ces choses visibles és vnes qu'ésautres, comme des Figures humaines ayant l'air qu'on appelle du bel Antique à celle du Moderne; Et pour les passages & autres telles choses d'vn pass aride, montagneux & remply de vestiges de l'Antiquité, & d'vn Colory comme brussé des rayons du Soleil, à celuy d'vn pass plat & remply d'arbres verds & de Plusieuts vestiges Modernes:

Ie dis aussi que tous ces diuers Ouurages estans bien executez selon leur Original ou Naturel, doiuent estre pareillement estimez, & que les diuers Gousts qu'on a d'iceux, sont vne chose à part, & qui n'a rien de commun.

Par ainsi quand tous les Curieux qui font tant d'estime de plusieurs Tableaux principalement des vieux seroient tous ensemble, & qu'ils composeroient sur iceux mille Histoires, pour nous assurer de leur Antiquité & de qui ils peuuent estre, & comme ils furent donnez à vn tel Roy, Prince, ou autres personnes de Condition, & successiuement comme par miracle ils sont tombez entre leurs mains; Cela ne fera pas qu'vn Praticien ou autre bien Connoissant soit par cela plus assuré de leur bonté, & l'auantage qu'ils peuuent auoir sur les autres; Mais bien lors qu'ils les aura veus & examinez de point en point, & alors sans auoir égard à toutes ces diuerses choses, il remarquera ce qui s'y rencontre de beau & de bon, Et quand mesme vn Tableau seroit de Raphaël, il connoistra s'il est de ses premieres, deuxiémes & dernieres Oeuures, & de ses bonnes; Carles Ouurages des hommes ne sont pas touhours égaux en bonté, bien qu'ils les ayent faits en mesme temps, sans conter ou mettre en auant la difference qu'il y a de ceux de leur apprentissage à ceux de leur chef-d'œuure, laquelle doit estre à mon aduis tres-grande.

Et dautant que ce sujet est tres-vaste, & qu'on ne trouueroit que trop de matiere d'en

escrire, & aussi que ce n'est pas mon dessein de m'y engager; je le finiray pour expliquer aucunement, comme vne personne non Praticienne peut acquerir quelque Connoissance des distinctions de plusieurs manieres de Peindre, puis que c'est vne bonne partie de mon Sujet.

CHAP. IV.

Sur la Distinction des diuerses manieres de Pourtraire & Peindre.

Auant que d'entrer en discours sur ce sujet, je me trouue obligé d'auertir que quelqu'un auroit la pensée de dire, qu'un tres-mauuais Copisse pourroit bien faire un Original; Il est vray, mais ce n'est pas sur de tels Originaux que les Sçauants veulent faire ces distinctions, ny dont j'entens de traitter.

T Ous les Ouurages de Pourtraiture & Peinture qui ne sont executez par la regle de la Perspectiue ne peuvent estre que fautifs, principalement quand ils sont composez de pluseurs Corps, de diverses For-

mes, & en diuerses Situations.

Quand lon entend cette regle, on voit incontinent si les Tableaux ont esté saits par icelle ou non, & s'ils ne l'ont esté, lon sçait bien faire la distinction si ceux qui les ont faits, auoient l'œil bien juste à discerner toutes les particularitez d'vn Corps, en va mot s'ils estoient excellents a pratiquer cét Art de la premiere maniere cy-deuant dire, qui est de n'auoir pour juge de son Ouurage que l'œil.

Si tous ceux qui pratiquent ainsi à veuë d'œil cét Art, copioient les mesmes Corps visibles de la Nature en sorte que leurs Ouurages sissent aux yeux la mesme Sensation ou Vision que seroit le Naturel, il y a 'apparence que lon ne discerneroit en aucuns d'eux des manieres differentes, ains au contraire vne seule qui seroit celle du Naturel.

De plus si le mesme arriuoit à tous ceux qui pratiquent la mesme chose par la regle & mesure Perspectiue, il n'y auroit non plus de Manieres qu'en celles des autres; Maisil y a en cela vne disference qui est, que deux Peintres estans dosez d'vn pareil Esprit, bon Oeil, & bonne Main, si l'vn venoit à s'exercer de Copier toutes ces choses par la regle, & l'autre à veuë d'œil, il est tres asseuré que le premier sera bien plustost, asseurement, & precisement ses Ouurages, que l'autre.

Cecy soit dit pour expliquer en gros, que le Naturel estant ainsi bien Copié, il n'y auroit point tant de diuerses manieres, car ainsi faisant plusieurs qui Copieroient d'apres Nature vne mesme teste communement nommée Pourtrait, & d'vne mesme position & distance, il arriueroit que tous ces diuers Pourtraits seroient entierement semblables, & qu'on ne pourroit pas dire celuy-là est de la maniere d'vn tel, ou d'vn tel, & ainsi le mesme des autres Corps visibles de la Nature,

Mais à cause que l'ignorance a regné en des temps parmy les l'raticiens de cet Att, il est en suitte arriué que plusieurs se sont sur les Ouurages des vns & des autres ainsi faits ou formez des diuerses manieres à leur fantaisie; & comme cela ces choses ont multiplié infiniment, du moins en tres-grand nombre, & tel que d'en vouloir deduire la vingtième partie, cela feroit vn monstrueux volume; Car il est tres-constant que si depuis que cet Art de Pourtraiture est inventé, il eust esté tousiours pratiqué par d'Excellens hommes sçauans en la Perspective & touchez de ce bon Goust, nous ne serions point si empelchez à discerner tant de diuerses manieres, du moins dans le gros de l'Ouurage; Mais cela estant, je me contenteray d'en prendre ou choisir quelques vnes, tant de l'Ancien Moderne qui est du temps de Raphael d'Vrbin ou peu deuant, que de celuy du Tinctoret, Paul Veronneze, & le Bassan, & austi des Carraces, & en suitte de quelques autres approchant du present.

l'auois eu intention de commencer par le temps plus prés de cettuy-cy, & remonter à l'Ancien, mais j'ay veu qu'il m'estoit plus commode de prendre le plus essoigné, & mesme que ce que j'en dirois seroit en quel-

que façon plus intelligible.

Dans le temps de P. Perugin, Maistre de Raphaël d'Vrbin, qui estoit és années 1500, & 1524. il y auoit enuiron cemesmetemps plusieurs Peintres, tant au lieu qui estoit sa demeure nommé Peruge qu'en quelques au-tres de l'Italie, & d'vne partie de l'Europe. En Italie il y auoit entre plusieurs autres; Leonard Dauinci, André Manteigne, Iean Bellin, Correge, Giorgion, Michel Ange, Bonarroti, tres-excellent Sculpteur, mais non si bon Peintre, Polidore de Carrauage, André Del Sarte, Le Titian, RAPHAEL D'VRBIN, & Iule Romain, la plus part d'iceux & principalement en leurs commencemens avoient des manieres de Peindre fort finies, & souuent de telle sorte que la plus grande partie paroist seiche, dure, tranchée & maigre, causée comme je croy par auoir voulu trop finir & acheuer, comme si lon eust deu regarder desdits Ouurages chaque partie à part, & non le tout d'vne seule œillade & d'vne raisonnable distance ainsi qu'il se doit.

Leonard Dauinci, auoit vne maniere de Peindretres-finie, & les couleursappliquées & estenduës fort vniement, & tiens auec plusieurs qu'elle luy estoit toute particuliere; Car à ce que j'en ay peu voir, il semble que les Iours & Ombres, soient par maniere de dire comme sousses, principalement les petites parties, ainsi que cela se peut voir en diuers Tableaux qu'il a faits, & messme en deux, l'vn de la Gioconde qui est à Fontaine-belle-eau, l'autre d'vne Flora qui estoit jadis au Cabinet de la feuë Reyne Mere Marie de Medica, Toutesois vne partie des œuures que

j'ay veuës de luy, tiennent tousiours en quelque sorte de la maniere de P. Perrugin, Jean Bellin, & de plusieurs de ces Anciens cy-deuant nommez, neantmoins bien plus excel-

lentes à mon gré.

Plusieurs ontaussi affecté d'imiter ponchuellement la Nature, telle qu'ils la rencontroient sans selon l'apparence distinguer le Goust de la belle proportion & beauté, d'auec celle qui est disproportionnée & laide, puis s'ils failoient des Histoires Anciennes, res-rarement se donnoient-ils garde de ce qui a esté dit cy-deuant, de rechercher des Airs de Figures, Vestemens & autres choses qui y conuinssent; ce qui se peut mesme voir en des œuures de Raphaël quoy que bien belles, neantmoins il appert par quelques vnes de celles qu'il a faites peu apres, qu'il avoit bien changé de maniere, & de plus encore dans ses dernieres, par lesquelles il a emporté la gloire d'en auoir fait de si Excellentes, qu'il ne s'en voit aucune qui aille encor du pair auec elles.

Dans son temps il y auoit diuers Peintres qui sui uoient en quel que sorte son Goust ou Maniere, entr'autres sule Romain, lequel a beaucoup trauaillé & peint sur, ou d'apres les Desseins d'iceluy, dont le plus grand nombre se voit au Vatican à Rome, lesquelles sont merueilleuses; il en a fait aussi de son inuention vne grande quantité de tres-belles à Mantone en la maison du T. Et ce qui me remplit d'estonnement est de voir que si peu

de personnes les ayent connues telles depuis tant d'années & que plusieurs des Peintres

n'en ayent esté touchez.

Il est aussi venu du depuis, d'excellens hommes, & mesme vn Disciple dudit Iule Romain nommé en ce pais l'Abbé de sainte Martin, autrement Bologne, qui a produit diuers beaux Ouurages, & entr'autres sait executer à Fraissq ou destrempe quantité sur ses Desseins, dans le Chasteau & Maison Royale de Fontaine belle-eau par vn Peintre nomé Messire Nicolo, du Commandement d'vn de nos Roys le Pere des Arts F. Premier, Mais quoy que les dits Ouurages soient excellens, neantmoins ils ne sont pas à comparer à ceux de Raphaël d'Vrbin, tant au Trait ou Contour desdites Figures, Propor-

tion, & Expression, qu'au Colory.

Il ya eu en France, en Allemagne & autres lieux enuiron le temps de ces Excellens, quelques Peintres qui auoient Inclination & Goust à ces manieres sinies, & dont chaque partiedemandoit à estre veue de tres-pres, comme entre autres pour l'Alemagne Albert Durer, Olbins, & autres, & jusques à pouvoir par maniere de dire en leurs Ouurages conter les poils dela teste des sigures ou autres de telles nature, ainsi que dela plus part de ceux dont j'ay parlé cy-deuant; Toutesois plusieurs d'iceux ont changé de maniere quelques temps apres, & mesme le Titian Car ses premières œuvres estoient ainsi fort sinies, tenans en quelque sorte de la manie-

re de Bellin son premier Maistre, & pour moy je trouue ces premieres & dernieres œuures les moindres qu'il ait faites, car les vnes estoient trop sinies & les dernieres trop peu.

Apresa paru le Tintoret, Paul Veronnoze, le Bassan, & plusieurs autres, tant à Venise, Florence, Rome, qu'en diuers lieux de l'Italie; Ceux-cy ou du moins vne bone partie, ne se sont pas tant attachezau naturel, & à des manieres de Peindre si finies, mais au contraire à des Croquées ou artistement touchées.

En suitte nous auons eu les Carraces principalement Anibal; Puis le Barroche, le Carramage, l'Espagnolet, Guid: Bollogneze, le Valentin, & bon nombre d'autres, lesquels quoy que differents en manieres ont tousiours esté en grande estime, & dont la pluspart ont tresbien Peint & d'yne maniere franche, libre, &

agreable.

Dans ce mesme temps & mesme deuant, il y a eu en France plusieurs bons Peintres comme du Brueil, Freminet, & Bunel. Toutessois moins en estime que ces derniers cy-dessus nommez, quoy qu'ils sissent voir en quantité de leurs Ouurages diuerses belles particularitez & grand Genie en cét Art. I'ou-bliois de dire qu'auant eux il y en auoit vn à Lyon communement nommé le peut Bernard, lequel à mon aduis a extremement bien fait, principalement en ce qu'on voit de luy graué en bois du Vieil & Nouueau Testament, & entre tous de plusieurs histoires du Vieil, où

il a donné des Ordonnances & dispositions si belles, & si esloignées de l'air du Moderne, ny mesime des choses de l'Antique, dont nous auós encore desvestiges en relief ou par écrit, qu'on diroit à les voir qu'elles expriment l'air & la forme de leurs temps, soit les Figures, Draperies ou vestemens, Animaux, Paisages & Bastimens, que plusieurs autres choses. L'ay creu deuoir cela à la memoire de cet Excelleut homme.

En Flandre, Hollande, Allemagne, & autres lieux, il y auoit aussi de bons Peintres; entreautres A. Bloemard à Vtreck, & P. Rubens, à Anuers; Mais à cause qu'il y auroit trop à dire sur toutes ces choses, je ne citeray aucuns de ces derniers, ny mesme la quantité de ceux qui sont à present en tous ces lieux, & principalement en Italie & en cette Ville, bien diray-je seulement que le nombre n'en est pas petit; Et n'estoit la crainte que j'ay euë de quelque jalousie, j'en aurois nommé vne bonne partie, toutefois je suis comme obligé afin de finir mon dessein d'en citter deux, l'vn François nommé N. Poussin de present à Rome, & l'autre Italien dit P. Bertin de Cortonne, ou CortonneZe, qui sans contredit & sans faire tort à aucuns, tiennent à present le plus haut degré d'excellence en cet Art, quoy que differents en Gousts ou maniere; l'vn, sur ceux qui sont touchez du Goust du bel Antique & du Raphaël; L'autre, sur vne bonne partie des autres Gousts ou manieres.

Or touchant cela, j'ay jugéà proposafin de

dire quelque chose sur quelques connoissances qu'on peut auoir de plusieurs d'elles, d'en comparer quelques vnes des Anciens Peintres, auec celles de ceux qui sont de quelques temps apres, ou qui en ont changé suiuant les diuers temps; Et sinalement jusques à celuycy, par ces deux que je viens de nommer.

Il y a quantité de Praticiens & autres, lefquels ayans veu vne personne vne seule sois, la reconnoistront d'abord plusieurs années apres, & seront aussi la distinction du changement qu'ils y remarqueront auenant qu'il y en ait, ces mesmes aussi seront capables de discerner l'air du visage, action & vestement, des diuerses nations les vns des autres, & mesmes quand elles se seroient vestues des habits des vns & des autres; Le semblable seront ils de la forme de plusieurs Bastimens ou Edisces, Animaux, Arbres, Plantes, & d'vne infinité d'autres corps visibles de la Nature.

Parainfi, il ya quelque raison de croire, que ces mesmes personnes peuuent en quelque sonte ayant veu diuers Tableaux dans vn temps, & sceu quels en estoient les Autheurs, les reconnoistre dans vn autre; Et comme d'ordinaire lon remarque les freres & quelques proches parents & autres pour auoir de l'air ou ressemblance de quelqu'vn qu'on a connu, pareillement ils peuuent ayant veu vn ou deux Tableaux d'vn Peintre, remarquer ceux qui en auront de l'air, ou qui approcheront de sadite Maniere; Ainsi lon peut juger qu'vne telle personne non praticienne à la-

quelle on aura monstré lesdits Tableaux, & faitremarquer la disserence d'vne maniere à l'autre, pourra faire la distinction de la plus grande partie: Or par la mesme raison, lon peut juger que ceux qui ayant veu vne, ou plusieurs fois, diuerses personnes ou autres telles choses, ne s'en souuiennent pas vn moment apres, sont en quelque sorte incapables de paruenir au discernement de ces choses. Et ceux qui pratiquent la Peinture & qui ont se defaut, courent grande risque de ne pou-uoir rien faire de resouuenir, ny en quelque sorte d'inuention.

Il y a des Peintres qui ont en quelque partie leur maniere approchante les vnes des autres, mais non tousiours à vn tel point qu'on ne les discerne bien, & que celuy qui n'est point dans la pratique, n'en fasse le mesme, apres s'estre instruit des capitales particulari-

tez.

D'ordinaire chaque Peintre à vne maniere affectée, si ce n'est à l'air, disposition, ordonnance & agencement des corps qu'il veut representer, ce sera en la forme, au Colory, ou au maniment du Pinceau, les vns representant ainsi que j'ay dit, des choses Modernes, d'autres des anciennes, & suiuat leurs temps; tels taschent de Peindre en rendant la superficie de leurs Tableaux vnie, ainsi qu'a fait entre plusieurs autres Leonard d'Anincy, sean Belin, Albert, & Olbins, & les couleurs fort esclatantes & viues.

Plusieurs sont aussi le mesme, & pour ce

qui est de la maniere de Peindre le contraire, affectans celle dont quasi tous les coups de Pinceau se peuvent distinguer, & ou les couleurs sont espaisses & fort esseuées en diuers endroits, principalement és Draperies, Ornemens, Broderies, & autres telles choses, ainsi qu'ont fait entre plusieurs autres, Tintoret, Paul Veronneze, & le Bassan, lesquels semblent mesme n'auoir voulu estre si curieux de belles & viues couleurs, ains au contraire les faire plustost en quelque sorte paroistre ternies ou salies qu'autrement; Or sur cela chacun peut auoir sa raison, Car les vns peuuent auoir dessein de Drapper ou Veftir leurs figures comme fi les estofes auoient feruy, & fusient en quelque sorte vsées, principalement pour la pluspart, & selon la qualité & condition qu'elles doiuent representer, & aussi souvent pour opposer les vnes aux autres, afin defaire faire à aucunes plus grand effect à l'œil.

La mesme chose arriue en la pluspart des autres Praticiens, en suitte de ceux cy-de-uantnommez jusques à present, ayant chacun des manieres & Gousts diuers, tant en leurs formes, dispositions, agencemens, qu'en leurs Coloris, Ombres & Ombrages; aucuns ont affecté & fait choix, ainsi que j'ay dit cy-deuant, du naturel du païs, qu'ils ont creu estre beau.

Le Titian a fait d'excellens Ouurages suiuantl'election de ses Originaux ou modelles, tant pour ce qui est du dessein, que principa-

lement

lement de la maniere de Peindre, dont le Colory est si beau, si vif, & si frais, en vn mot tellement de chair, qu'il est comme inimitableaux Copistes; Ce qui n'a esté en quelque sorte bien imité en nostre temps, que de feu Vandike Peintre Flamand, & fur tout es Pourtraits: Ledit Titian a rendu tesmoignage par ses œuures, qu'il n'auoit pas eu les yeux ouverts pour reconnoistre ce goust cy-deuant dit, des beaux Antiques, & de Raphael; & que lon y remarque des vestemens, coiffeures, airs des testes, & autres choles de l'vlage, qui tiennent de l'air & mode Venitienne; Sa maniere de Peindre fauf fa premiere & derniere, ne paroist pas en la plus part de ses œuures, finie, leschée, ny aussi trop croquée, mais touchée si à propos, que quoy qu'elle ne donne pas vn grand agréement à plusieurs personnes en la regardant de prés, elle en fait vn merueilleux de loin; Il a eu vn grand goust & genie aux païsages, encore qu'ils ne peuvent guere satisfaire, ceux qui n'ont pas les yeux ouuerts à reconnoistre ce qu'il y a de plus beau & extraordinaire ; Lo Teinstoret, & principalement Paul Veronneze, se sont beaucoup seruis pour Modelles des Figures du lieu où ils estoient, ce quise remarque facilement, non seulement à l'air & proportion desdites Figures, Mais és habillemens & à plusieurs autres particularitez en vsage audit pais; Ainsi en a fait le Bassan, ayant imité artistement plusieurs de telles choses, lesquelles prises & considerées chacune à

part, sont tres-belles, & seront plus estimées en cela qu'en leur disposition, ordonnance & expression; Il a affecté vne maniere de Colorer, Ombrer & Ombrager, bien brune, quoy que le sujet sust exposé en jour de campagne, & pour ce qui est de l'expression qu'on doit donner aux diuers corps qu'on veut representer ainsi qu'ils le requierent, ses diuers ourages monstrent qu'il n'en estoit

pas touché.

Les autres, comme les Carraces, Barroche, le Carrauage, & plusieurs cy deuant nommez, sontaussi tous differens en gousts, toutefois leurs desseins, ordonnances, expressions, & manieres de Peindre, beaucoup moins artistes ou croquées, que celles de ceux dont je viens de parler ; Le Carrauage imitoit la Nature en son air & en son trait, telle qu'il en auoit le goust, il a bien fortement & franchementacheué ses Ouurages, & assez bien arresté, mais pour le Colory des Ombres, il le l'a porté extremement au clair & au brun, ainsi que plusieurs autres, & de telle sorte, qu'ila esté comme au pur noir, ou du moins à la lumiere du flambeau, lampe ou chandelle, & d'vne noire nuict; Lespagnoles a fait aussi de belles choses, toutesois suiuant son modelle, l'ayant souuent choisi bien essoigné de cette belle proportion des beaux Antiques, il a donné vne grande force à son Colory & en plusieurs, grand agréemens; Le Guide a aussi fait de tres-beaux Ouurages & bien arrestez & d'yne maniere de Peindre

tres-franche, toutesois elles ne tiennent pas non plus de ce grand Goust, ny mesme celle du Gentilesse, & du Valentin, quoy que leurdite maniere sust en quelque partie tresnaturelle.

l'ay cy-deuant dit, que nous auions en ce temps quantité d'excellens Peintres en diuers lieux & notamment en cette Ville, & que d'iceux pour cause je n'en choisirois que deux qui sont de present à Rome, sçauoir N' Poussin, & P. de Cortonne, ledit de Cortonne a d'excellens dons, & capable d'executer de tres-grands ouurages, & lesquels paroissent extremement nobles & riches, & d'vne grande Vaghezza, Inuention & genie en ses Figures, & en quelques autres dependances

dont il a composé ses Tableaux.

Pour le Poussin ce que j'en ay dit cy-deuant, doit suffire pour reconnoistre en partie ce qu'il est, seulement diray-je que ceux qui suiuroient ses mesmes traces pour s'auancer en la pratique de cét Att par ce grand goust; ne seroient pas en mauuais chemin; Et pour ceux-là qui feroient essection de ses œuures, principalement de celles qu'il a faites depuis huict ou dix ans en ça, ou de pareilles, pour roient bien s'asseurer aussi, d'auoir de beaux & bons Tableaux, & tels qu'il est assez are d'en auoir de beaucoup meilleurs, soit Histoires, Païsages, que plusieurs autres Representations; estant à mon sens tres-vniuersel, & à vn tel point, que j'ay veu mesme des Païsages qu'il a faits par diuertissement, qui

doiuent tenir le premier rang en ce genre

d'Ouurage.

Et dautant que tous ceux qui pratiquent l'Art dela Pourtraiture & Peinture ne se sont pas tous adonnez à cette vniuersalité, les vns se portans à faire des Païsages, d'autres des Mers, Rivieres, Vaisseaux, & quelques Ports dicelles, des Animaux, Oyseaux, Poissons, Fleurs, Fruicts, & diuerses autres telles parzicularitez de la Nature ; j'ay creu dire icy qu'on peut de la sorre de ceux de cy-deuant, & par la mesme raison, en reconnoistre les manieres, ainsi que j'ay dit, par la connoissance qu'on a de la forme de toutes ces choses suiuant les diuers pais; Car sans contredit les Terres, Arbres, Fleurs, Fruicts, en sont differents, tant en leur Forme, qu'en leurs Couleurs, semblablement les Animaux, Poissons, & Oyseaux, combien que de mesme espece, comme les Cheuaux, Bœufs, Moutons, & vn tres-grand nombre d'autres chofes; Outre ces diuersitez, il y a aussi parmy ces Praticiens, de differentes manieres de Peindre, de sorte que ce sont deux moyens de les distinguerles vnes des autres, & principalement lors qu'on a fait discerner ces particularitez sur lesdits Ouurages effectifs.

Detoutes ces dernières sortes de Praticiens esdites choses particulieres de la Nature, sur tout des Anciens, il nese voit guere de leurs Ouurages, du moins de la plus grande partie, qui soient tenus pour excellens, & semble aussi qu'ils ne s'adonnoient pas si ordinairement qu'à present, à pratiquer en particulier ces diuersitez, comme du temps de plusieurs Peintres Flamans, tels que Breugle, Paul Bril, Goiuert, & Adam Helshamer, pour les Païsages: Pour les Tempestes des Mers, Adam Vrom, l'excellent Parcelles & Montagne,

& pour les Animaux Seneydre.

Dans letemps de ces Autheurs il n'y auoit en France rien de comparable à eux en ces choses, & mesme fort peu d'excellens pour les Figures & Histoires: Enuiron le dit temps & vn peu apres, il y auoit en Italie principalement à Rome, plusieurs excellens Peintres en ces sortes d'Ouurages, comme Paul Bril, cy-deuant nommé, pour les Passages, & Philippe Napolitain, & en suitte Corneille Polembourg. Le Cheualier Maho, & le Gohe pour les Fruicts & autres telles choses. A present il y en a vn bon nombre de ce genre, & pareillement en ce pais, & en diuers autres lieux de l'Europe, dont je tairay les noms pour le su-jet cy-deuant dit.

Et dautant que plusieurs des Peintres de teis Ouurages, principalement ceux qui imitent des Vaisseaux & diuers Ornemens d'or & d'argent, tant d'Orpheureries que de Broderies, expriment la plus part de ces choses, par des Couleurs couchées en diuers endroits extremement espaisses & si fort de relief, que bien souuent elles le sont autant ou plus que le Naturel; j'ay trouné à propos de dire icy en passant quelque chose de mon Sentiment sur cela; Ic croy donc que cette manière ne s'est

instituée, qu'à cause qu'il est difficile & plus long, d'exprimer par vne Couleur couchée vniement, les Esclats des Pierreries & des Metaux, & autres Corps polis & luisans que par icelle; & qu'ayant ainsi appliqué des Couleurs esleuées & grasses, elles reçoiuent fortement la lumiere ou jour, ce qui fait vn esclat approchant du Naturel, & par consequent Grand effet; toutefois à le bien prendre il ya quelque chose à dire sur cela, Premierement és Tableanx d'Histoires, Car à tels ilse rencontre que diuerses Broderies lesquelles au Naturel ne sont souuent guere de relief, le sont autant on plus au Tableau, & que les autres plus puissans Corps imitant ledit relief ou ronde bossen'en ontaucun; Il y a aussi cecy de mauuais en tels Ouurages, que quand la poussiere & ordure vient à entrer dans ces concauitez de Couleurs, ils perdent la plus grande partie de leur effet, & ce qui est encore considerable c'est, que si vous venez à changer lesdits Tableaux de jour, ces esclats feront vn tout contraire effet; Toutefois cela n'empesche pas qu'on ne pratique plusieurs choses de la sorte, mais quant à moy je croy que ce deuroit estre de tels Corps à part.

Ie reuiendray donc à mon but en reiterant que les Praticiens de cét Art, & notamment ceux qui ont le don de faire d'inuention ou d'apres le Naturel, & qui se sont versez à voir & considerer les diuerses manieres ou Ouurages de ces Peintres, peuvent facilement en reconnoistre d'autres de ces mesmes, & aussi en donner grande connoissance à ceux qui ne sont point Praticiens, & qui ontamour, genie ou inclination à ce saire; C'est ce que j'ay eu intention de dire pour le present sur la distinction des Manieres; Reste à deduire ou expliquer celles des Tableaux Originaux d'auec leurs Copies.

CHAP. V.

Touchant la distinction des Originaux d'auec leurs Copies.

N Tableau Original peut estre compolé de toutes sortes de Corps visibles de la Nature, ou du moins de la plus grande partie, soit que celuy qui le peut auoir sait, les ait imitez apres le Naturel, ou bien faits de son genie ou inuention, tant à veue d'œil, que par regle de Perspectiue: Ledit Tableau peutaussi n'estre composé que d'vn seul desdits Corps ou Objets, & fait de l'vne ou de l'autre de ces deux sortes de pratique, soit à veue d'œil ou par regle.

Sur chacun de ces Originaux il s'en peut faire diuerses Copies, les vnes par de plus excellens Copistes que les autres, & par ainst meilleures l'vne que l'autre, & pareillemêt des Copies sur ces premieres, & ainsi successiue-

ment Copies fur Copies.

Lors qu'vn Peintre est venu au point de faire quelques Ouurages, aucunement raisonnables, d'apres Nature ou d'inuention il luy est comme impossible, ou du moins il se trouue tres-embarassé & déplaisant, d'estre reduit ou obligé d'en Copier, à moins qu'ils soient bien plus excellens que les siens, ou qu'il ait affection de ce faire; Ce qu'estant, j'auouë que ce qu'il sera sera sans comparaison meilleur que ce qu'vn Copiste pourroit saire, mais cela n'empeschera pas qu'il ne se trouue empesché en diuerses rencontres dans l'operation, à cause de la contrainte.

Tant plus le Naturel est beau, & bien proportionné, tant plus l'Ouurage fait d'apres iceluy, doit estre excellent, estant sait par vn bon Ouurier; De mesme, dautant plus qu'vn Tableau est excellent, dautant la Copie saite

fur iceluy doit estre excellente.

Or comme le Peintre qui imite le Naturel, ne viet jamais à la mesme persection d'iceluy; ainsi le Copiste ne rend jamais sa Copie à la

perfection de son Original.

Ceux qui font leurs Outrages d'apres le relief ou Natutel, & aussi par les regles, taschent desaire paroistre de relief le relief, tendre le tendre, dur le dur, moset le molet, & ainsi du reste.

Ceux qui Copient les dits Ouurages, taschent bien d'en faire le mesme, mais comme le Naturel & relief est d'ordinaire de beaucoup plus parsait que l'Ouurage sait sur iceluy, de mesme l'Original est-il plus parsait & complet en ces choses que sa Copie.

Celuy qui a le don defaire d'inuention, & qui a l'œil bon à distinguer la tendresse,

mollesse, & l'affoiblissement des profils, contours, ou extremitez tournans, & fuyans, de la masse des corps, & de leurs autres parties, principalement des ronds, & la main &le pinceau libre pour les executer ainsi, doit faire vn plus grand effort, & en tirer quelque chose de meilleur que le Copiste; Et encore que ledit Copiste aye des pratiques mecaniques assez certaines, pour prendre sur son Original le Trait ou contour de ces Corps ou Figures, il ne laisse pas bien souuent d'en corrompre vne bonne partie, principalement lors qu'il tasche d'en Peindre & perdre les extremitez ou contours tournans, & en suitte les Eminences, Muscles & autres particularitez; Car vne bonne partie de ce qui fait arrondir, tourner & fuir, ainsi ces contours, est assez difficile à bien pratiquer, dautant qu'il faut estre sçauant & entendu en cette circonstance, & qu'il est rare qu'vn Copiste en soit bien instruit, autrement il seroit en quelque sorte capable de faire d'inuention, car en la plus part des Copies, au lieu que les corps imitans le relief doiuent paroiltre tels, ils sont comme s'ils auoient esté applatis on mis. en presse, & pour parler en terme comme s'ils estoient en vn mesme plan.

Lors qu'vn Original est frais fait, il est plus facile de le bien Copier qu'estant vieil, principalementlors qu'on est obligé de faire ensorte, que les couleurs de la Copie qu'on en fera demeurent long temps de la mesme force & couleur dudit Original; Carlon connoist bien mieux quelles couleurs sont entrées dans le frais sait, que dans l'autre.

Outre la connoissance des Couleurs qu'il faut imiter, tant aux carnations, ou chairs & Draperies, qu'és Coloris des autres divers corps, il y a l'vnion ou beau messange des dites Couleurs, tant és places des Iours, Teintes & demye Teintes, qu'és Ombres & Ombrages, & de plus que suivant leurs diverses parties, le tout soit bien alié, noyé, ou comme sondu ensemble, chacun en la place ou cha-

que chose doit s'estendre.

Les Tableaux qui sont d'vne maniere finie, fort leschée & pennée, ainsi que plusieurs des vieux que lon voit, & où les poils ou cheueux des figures & autres telles choses deliées, se pourroient en quelque sorte conter & voir, d'autant que lesdits poils & autres parties d'iceux, sont faits auec la pointe du pinceau, semblent estre bien plus faciles à imiter, puis que la pluspart des pinceaux ont pointe, & aussi que les Contours & tournans desdits Corps sont d'ordinaire en quelque sorte coupez & tranchez, mais ce que les Copistestrouuent difficiles parmy plusieurs autres choses, est de pouvoir estendre vniement, tendrement, & également, les Couleurs, principalement lors qu'il faut exprimer des Iours sur les Eminences : Car quand ces choses sont ainsi couchées inegalement, il y paroift destaches blanchastres & grizastres, lesdites grizastres sont celles où il y a peu de Couleur, & les blanchastres où il y en a dauantage ; ainsi lors qu'on voit ou remarque en tels Ouurages de ces inegalitez & de la peine au maniment, application & norissement desdites Couleurs, lon en fait mauuais jugement; De plus, les Copistes mesmes les bons, ont bien souvent grande peine de rencontrerle vray Colory ou Carnation des figures, principalement pour les Teints vn peu delicats & d'vne certaine blancheur qui se rencontre souvent aux belles semmes & enfans; De sorte que j'en ay veu plusieurs Co-pies, qui sembloient plustost des Coloris de plastre ou croye, messée ou alliée d'vn peu de rouge par quelques endroits, que non pas de la chair; C'est pourquoy l'opinion de plusieurs Copistes, & melme des Peintres Originaux, lesquels ne peuuent trouuer de tels Coloris, est, que c'est le Temps qui leur a donné cette Teinte tant soit peu jaunastre; Ie sçay bien qu'il y a des Couleurs & des huiles, qui font que le Temps opere en quelque forte sur icelles, mais neantmoins ceux qui ont les yeux vn peu clairs-voyans, discernent bien que cela n'est pas de la mesme Teinte, de celle desdits Originaux; Et ce qui fait encore contre cette Opinion est, que lon voit des Quurages d'excellens Peintres Modernes, & tous frais faits, lesquels ont cette belle carnation, laquelle represente vn Teint bien blanc & frais.

Dauantage, outre la forme, Trait ou Contour, des diuerses parties, il y a encore vne circonstance qui s'estend jusques à la fin de l'Ouurage, c'est la pratique & maniment du Pinceau pour les former, & de laquelle depend vne bonne partie de la connoissance de ces choses.

Les Ouurages de Peinture qui sont faits d'vne maniere libre ou franche, & en quelque sorte artistement touchée, & d'vne grande vnion, & non traittée ou pratiquée à coups de pointe de pinceau, sont assez difficiles à imiter, en sorte qu'on ne connoisse en eux la peine qu'à euë le Copiste en les imitant; De plus, il voitaussi en son Original, qu'vn seul coup de pinceau a fait ce qu'il à bien peine de faire en cent, & qu'vne partie de la cause viet, qu'il ne peut auoir aux occasions des pinceaux semblable à ceux dont lon s'est seruy; Car chacun sçait & principalement ceux qui ont pratiqué ces choses, que celuy qui fait vn Tableau Original, ce sert d'ordinaire plusieurs fois des mesmes pinceaux, & quelquefois jusques à vn point, que la pluspart sont quasi vsez & qu'il les trouue bien souuent meilleurs ayant seruy qu'autrement, & mesme que plusieurs les ayant neufs, les coupent & vient par endroits, pour estre plus doux par les bouts & qu'ils ayent diuerses pointes ou sormes irregulieres, afin qu'ayans à faire plusieurs choses, comme des cheueux ou autres poils, faisant touffes, floquets, ou friseures, &c. Ils les puissent faire librement & coulemment, & auec moins de temps.

Or ces choses ainsi executées, donnent bien du trauail à celuy qui les veut imiter, le

melme

mesme est desautres menues parties, comme destouches ou coups de pinceau, qui forment celles qui composent vne figure humaine ou animale, ainsi que les sourcils, yeux, nez, bouches, oreilles, mains, pieds, & autres telles parties, où il se rencontre d'exprimer entre des tournans & concauitez ou les ombres se cachent, & celles qui sont accompagnées de poils; Car elles se doiuent representer artistement touchées, & de sorte que ce ne soit point par des coups de pinceau, dont le Contour de la touche d'iceluy paroisse tranché ou coupé net, comme est d'ordinaire celuy d'vn trait de plume, ou lors que lon veut imiter par la Peinture des corps ou objets faits de pierre, & principalement de celles qui sont tres-dures: Carily auroit bien de la difference entre vn Tableau fait de blanc & noir, representant vne figure humaine, & vn autre d'vne mesme figure de marbre, Car ledit marbre n'a point sa superficie si inreguliere, ny mesme ce qui est plus considerable, velue comme a le Naturel; car qu'vn corps de fem-me ou autre figure humaine, soit tres-poly & vny, cela n'empesche pas qu'il n'y ait sur la superficie vne sorte de poil ou cotton, lequel aux bons yeux paroist tres-sensiblement, & fur tout és tournans, & de plus és concauitez cy-deuant dites, à cause que des tournans venansà se joindre ensemble, lesdits poils se fourrent, & entrelassent les vns dans les autres, ainsi que seroit vne bogue de Chastai-gne à demy retournée, ou pour mieux me

faire entendre, comme cela se remarque sensiblement à diverses personnes peu curieuses, dans les narines, & és oreilles, & autres parties ordinairement cachées, & desquelles lors qu'on en vient au Colory, ceux qui sont d'vn poil noir cette sorte de velu tient aussi de la mesme couleur, ceux qui sont blonds le mesme de couleur blonde, & aussi semblablement les roux; Ainfi lon peut juger que les corps qui sont saits de matieres dures, comme des diuers metaux & mineraux, yuoire, corne, bois, & autres telles matieres, n'ont pas de leur nature la superficie ainsi veluë, & que de chacune d'elle les Contours des plus dures matieres, paroissent à l'œil plus tranchez ou coupez que les autres; Ainsi lors que l'Ouurage d'vn Peintre qui est imité sur des corps humains, soit viuans, soit morts, quoy que Coloriez, paroissent tels, c'est manque d'auoir fait reflexion à ces choses, & qu'il faut pour bien faire que la chair paroisse chair, la pierre pierre, le bois bois, & ainsi semblablement toutes les autres matieres; Or comme la pluspart des Copistes n'ont pas fait toutes ses remarques, & mesme qu'il y ena qui ne se sont que tres-peu adonnez à faire d'inuention ou imiter le naturel , ils n'expriment pas bien ces choses, quoy qu'ils les voyent toutes faites sur la pluspart de leurs Originaux; Il se rencontre aussi que plusieurs qui Copient d'apres le naturel ou de ressouuenir, ne sçachans point ces particularitez, ne font pas faire tout l'effect desiré sur cela, leurs yeux

n'estans pas d'ordinaire si bons pour les bien discerner, le mesme font divers Copistes encore que leurs Originaux ou Patrons exprimet bien en quelque façon ces choses; dauantageil est come impossible quel'Art puisse de tout point imiter la nature, le mesme arrive aux Copistes, laissant tousiours quantité de perfections à faire en leurs Copies, qui se trouuent en leurs Originaux, de façon que la pluspart des Copies qu'on voit outre ce qui a esté cy-deuant dit, lon les reconnoist telles par cette derniere particularité; Car ces choses qui y doiuent ainsi bien faire paroistre leur relief & tournant, & sembler bien perdues & messées ensemble dans vne vnion & Couleur des airs qui les enuironnent, & le tout franchement fait, semblent plustost en quelque sorte plattes, & les Couleurs Teintes & Ombres distinctes & separées les vnes des autres, comme des pieces de diuerses Couleurs rapportées ou cousuës ensemble, & le tout semblant attaché au fonds, & finalement tout le reste du trauail sentant sa peine & sueur, ou pour mieux dire son incertitude. Or ces choses ainsi mal executées paroissent dures, seiches & tranchées, & c'est ce qui arriue d'ordinaire aux copies; aux mauuaises dauantage, & aux bonnes moins.

Vn bon Copiste se trouve aussi souvent tres-empesché, de rencontrer des Huiles & des Couleurs qui puissent estant broyées & aliées ensemble, & en suitte appliquées, demeurerapres qu'elles sont seiches de la mesme Couleur & Teinte que celles de son Original, principalement quand il est vieil sait; & suis asseuré qu'il ya peu de Copies & comme point du tout, qui puissent en presence de leur Original, passer aux yeux des Connoisfans Praticiens pour autres que ce qu'elles sont.

Ceux quisesont adonnez à la pratique de Peindre, & à telles particularitez, sçauent distinguer les Couleurs qui se sont mortes ou passées promptement, d'entre celles qui le

sont déslong-temps.

Pour ceux qui sçauent connoistre vn Original, quoy qu'ils n'ayent jamais veu d'autres Ouurages de celuy qui l'aura fair, il est aisé à croire que la connoissance ne leur en peut Venir que par la liberté de l'execution & les belles parties qu'ils trouuent dans les dits Ouurages, ce qui leur fait conclure qu'il est fait d'inuention ou d'apres Nature; auec fermeté & sçauoir; Ainsi on conclud aussi lors qu'on reconnoist vn Ouurage estre fait auec peine, & comme d'vne main tremblante & incertaine, & à plusieurs autres choses, que c'est vne Copie.

Il y a des personnes qui manquant de meilleure connoissance pour remarquer toutes les particularitez cy-deuant dites, Examinent les sonds ou toilles sur lesquelles l'Ouurage est fait, & pariceux veulent juger de leur Ancienneté, comme si vn Peintre ne se pourroit pas seruir d'vn sonds ou toille d'vn mauuais Tableau vicil, pour en peindre ou faire vn

deffus. F ii

Mais pour moy je conclus par ce qui a esté cy-deuant dit, que la plus belle connoissance est, d'estimer les Tableaux, Desseins, & Tailles-Douces, par la bonté qui est en eux, & non par la reputation de leur Autheur, en sçachant ou reconnoissant en gros s'ils sont bien faits par regle, ou à veue d'œil; Et en destail, pourquoy telle chose est belle ou laide: Car de reiterer souuent quand on considere ces choses, qu'elles sont tres-belles & admirables, & de plus y adjoustant de ces diuers mots de l'Art, cela n'est rien dire d'assuré ; Et d'autant que j'ay meslé parmy ce que j'ay dit cy-deuant, plusieurs choses qui sembleroient estre inutiles à mon dessein, & qui pourroient auoir fait eschaper de la memoire quelque chosedu principal; Iel'ay voulu resterer icy par vn abregé pour leur faire reuenir.



CHAP. VI.

Recapitulation par abregé fur le fujet cy-deuant deduit de la connoissance des diuerses manieres de Peindre, & distinction des Originaux d'auec leurs Copies.

Omme il a esté dit que plusieurs per-sonnes ont le don de reconnoistre & discerner l'air des figures humaines de diuers païs, & de plusieurs autres choses de leur vsage, les vnes des autres ; le mesme pequent-ils faire en quelque sorte des Ouurages de la pluspart des Peintres qui y habitent: Semblablement si lesdits Peintres, ont vne maniere produite de leur inuétion, suivat le bon Goust ou autrement, l'on peut en ayant veu quelques eschantillons, en retenir ou auoir l'air ou l'idée emprainte dans l'imagination, pour à la rencontre ou occasion, en reconnoistre d'autres de la mesme main ; car plusieurs ont d'ordinaire outre le dessein, chacun leurs diuerses manieres, de Colorer, & d'appliquer leurs Couleurs; les vns tres-vniment, quoy que nourries ou espaisse, les autres auec tres-peu, & d'vne maniere qu'on nommefrottée; D'autres ont Peint aussi en chargeant ou nourrillant de Couleur, & en l'appliquant plus irregulierement à coups de broisse ou de pinceau, & sur tout aux Ornemens & autres telles choses, de sorte qu'il s'en voit, comme j'ay dit, où il y a de la couleur par endroits & plaques en relief ou sail lies hors du Tableau de plus d'vne ligne; Il s'en voit aussi dont le Colory, quoy que sait à mesme dessein est tres-different les vns des autres. Ains par ce moyen il est aucunement facilea ceux qui ont la disposition & imagination pour se ressource il de sorme & maniere de ces choses, de les distinguer ou discerner à l'occasion. Reste le plus dissicile, qui est de reconnoistre les originaux d'auec leurs Copies.

Touchant la distinction des Originaux & Copies.

CHacun sçair, que des Ouurages qui sont faits par d'Excellens Peintres, & selon leur Goust ou volonté, vne bonne partie doit paroistre aux yeux de ceux qui les considerent, bien raisonnablement, librement, & franchement executée; Et au contraire en ceux qui sont saits de sujettion ainsi que les Copies, lon y remarque l'incertitude, la peine & la sueur, qu'a eu leur Autheur en les faisant.

Vne grande partie de ceux qui pratiquent l'escriture, principalement les Iurez Escriuains & plusieurs autres, sçauent au besoin juger des Originaux & Copies des Escritures & Signatures, encore qu'il est vray-semblable que lon peut plus precisement contresaire ou copier de telles choses, qu'vn Tableau de Peinture, qui est sans contredit bien plus composé; Car les plumes ne varient pas de forme à comparaison des Pinceaux, ny l'ancre dans icelles à l'égal des Couleurs; Chacun sçait que les grandes lettres & traits de l'escriture, sont beaucoup plus difficiles à bien contrefaire que la simple escriture, ou corps de lettre, qu'és vns il y faut grande liberté de main, & aux autres non; La grandeur & forme desdites grandes lettres & traits dependent d'ordinaire de la volonté de ceux qui les font, le contraire est à ceux qui les veulent imiter, car ils se trouuent contraints & gelnez, & ainfi lon reconnoist que ce qu'ils en ont fait est d'ordinaire tremblant & corrompu en ses formes, en vn motil paroist fait, sans aucune certitude ou asseurance; Et dautant plus lesdits traits & grandes lettres sont de forme grande, dautant plus sont-ils difficiles à bien imiter ou contrefaire.

Le mesme est des Tableaux & Desseins, Car les corps qui les composent estans tresgrands, tant plus sont-ils difficiles à Copier, pareillement lors que la maniere de les Peindre est franche & libre, à comparaison des Ouurages en petit, & d'yne Peinture ou ma-

niere, penée & lechée.

Il y a des manieres de Peindre, où lon voit que la plus part des coups de pinceau y ont esté en plusieurs endroits appliquez tout d'vn coup & sans y retourner à diuerses sois, & d'autres où il paroist tout le contraire, estant peintes, & repeintes, retouchées, frot-

tées, & refrottées, soit és manieres paroissaites, croquées ou artistement touchées, soit en celles qui sont since & tres acheuées, bien

qu'elles soient Originales.

Il y a des Copies qui ne se peuuent gueres remarquer telles, que par des Praticiens bien versez en cette connoissance, à cause qu'elles autont esté executées par debons Copistes, & dans le mesme temps des Originaux fraischement acheuez, & souuent sous la conduite de celuy qui aura fait le sdits Originaux, & qui mesme les aura retouchez en diuers endroits.

Lors que de telles Copies sont faites de sort long temps, & qu'elles ont à diuerses fois esté frottées, nettoyées & vernies, & qu'on n'a point les Originaux presens; le croy qu'vn Excellent Peintre qui s'est adonné à cette recherche feroit beaucoup de les pouuoir reconnoistre telles, puis que c'est le plus grand effort qui se peut faire sur cette matiere; Ce n'est pas qu'en plusieurs de ces Copies retouchées, il ne soit assezfacile de reconnoistre tels retouchemens, mais non aux Copies qui sont faites par des Peintres qui commencent d'estre capables de bien faire d'Inuention; Et quand lesdits retouchemens sont faits auec foin & finis; I'ay austi veu diuers Excellens Peintres, retoucher fraischement sur des Copies faites chez eux d'apres leurs Oeuures, & si artistement par des coups comme à creu, ou à sec, qu'vne personne tant soit peu versée en ces particularitez les auroit reconnus d'abord, il y a aussi des Copies Modernes saites sur de tres-vieux Originaux, où lon n'a point eu égard d'en rendre les Couleurs si passées ou ternies qu'elles paroissent, entr'autres les vertes, & les bleues, au contraire il paroiste qu'on a tasché de les rendre ou saire paroistre telles qu'elles estoient, quand les dits Originaux surent saits: Ainsi de telles il n'y a pas grande difficulté mesme aux Curieux non Praticiens ny connoissans à les reconnoistre, Sçachant que les dites Couleurs ne restent pas

vn fi long temps belles.

D'autres ont tasché & taschent encore, de rendre leurs Couleurs toutes semblables à celles de leur Original, & ainsi faisant il arriue diuerses choses qui les sont remarquer facilement, & entr'autres celle-cy; qu'en voulant ainsi imiter plusieurs diuerses Couleurs ternies ou changées, elles ne restent pas long temps de la sorte, ains au contraire la plus part paroissent peu apres beaucoup plus mortes, desteintes, ou passees que celles de l'Original; & ce qui est de mal ne changent pas d'ordinaire toutes par mesme degré ou proportion, au contraire les vnes restent belles, & les autres laides, & bien souvent par taches; Et pour preuue de cela, il n'ya qu'à remarquer à diuers Tableaux qu'on a voulu racommoder, entr'autres à ceux qui se sont coupez, fendus & escaillez, tant ceux sur bois que sur toile; où il se voit qu'ayant voulu y remettre en tels endroits de la Couleur, d'abord elle y paroissoit conuenable, mais

quelques jours & mois apres, elle auoit tellement changé qu'on ne les pouuoit souffrir, laissant vn repentir à ceux à qui ils appartenoient de l'auoir fait ou fait faire, ayant esté bien plus contens de les r'auoir tous froissez & escaillez comme deuant, que rajustez de la sorte.

Ainsi lon peut juger, que tous les bons Praticiens qui se sont appliquez ou adonnez à esplucher toutes ces particularitez, peuuent estre les plus entendus à discerner toutes ces diuerses manieres, & distinctions d'Originaux & Copies, & de plus les bonnes d'auec les mauuaises, & aussi qu'il est facile de juger que c'est par le moyen de tels connoissans, que les Curieux non Praticiens, peuuent auoir esté & estre instruits à faire la distinction de toutes ces diuerses choses

Venons maintenant à ce que j'ay eu intention de dire, touchantles Tailles Douces,





术术术术术术术术术

CHAP. VII.

SVR LA DISTINCTION des Diuerses manieres des Stampes ou Tailles-Douces, tant des Originales que des Copies.

Vand je commençay ce petit Traitté, j'auois comme deliberé de m'estendre fur l'explication des diuerses manieres des Stampes ou Tailles-Douces tant au Burin qu'à l'eauforte, & mesme en Bois; Mais ayant reconnu que cela est trop peu de chose à comparaison des Tableaux Peints, Ie me suis resolu de la faire courte; Toutesois auant qu'en dire aucune chose, il est de besoin d'estre auerty qu'il faut faire distinction de ce que plufigurs Praticiens & Curieux noment ordinairement bonesStampes. Ils estiment à l'exclusion des autres, celles dont le trait ou dessein est bon, ou qu'il est estimé tel, sans considerer ny faire cas de la beauté de la graueure; de forte qu'ils feront bien plus d'estime d'vne Stampe mal grauée mesme àl'eau forte ou en bois, que d'vne du plus beau burin qui se vove.

Il y en a d'autres qui ayment & trouuent leur satissaction en la beauté de la seule graueure sans s'arrester au dessein; Mais pour les vrais Curieux & connoissans, ils seroient bien contens que l'vn & l'autre sust ensemble; Et dautant qu'vne bonne partie des bons Graueurs ne se sont pas trouuez aux lieux, à l'occasion, & dans le temps de plusieurs grands Peintres & Dessegnateurs, ils ont graué sur les Oeuures de diuers autres beaucoup moins excellents; Or cela n'empesche pas que plusieurs desdites Stampes ne soient tres-necessaires ou prostables à quantité de personnes, principalement à ceux qui pratiquent la Graueure; afin de s'instruire sur icelles. Mais il est temps dessuire ce que j'ay proposé.

Chacun sçait ou peut sçauoir, qu'il ne nous apparoist pas que ledit Art de la Graueure, tant sur le Cuiure que sur le Bois, pour en imprimer des Stampes, soit fort ancien: Car s'il en estoit autrement, les Ancienss'en seroient

seruis pour leurs escrits.

Plusieurs tiennent, que l'origine ou commencement, ou crainte de s'abuser, la restauration de cét Art, n'est que vers l'année 1490. & sur ce sujet je commenceray à nommer les premiers qui l'ont mis ou remis en pratique; Israel, Martin Schon ou le Tudesque, & quelques autres nommez par les Curieurs, les Maistres au Chandelier, & pour leurs Stampes elles ont le nom de pieces de mauuais noir ou ancre, dautant qu'ils n'auoient pas encore la bonne maniere de la faire, ce qui se remarque en elles par l'huile qui a jauny le papier, y estant entrée apres s'estre separée

du noir faute d'auoir esté cuite ou brussée.

Dans l'Allemagne vers l'année 1510. estoir Albert Durer, Disciple des deux cy-deuant nommez, lequel a fait des Oenures, tant au burin qu'en bois, sur ces desseins, où il semble comme impossible de faire mieux, tant pour la netteté, finissement & trauail dudit burin, que pour l'impression; Et touchant les Stampes en bois, il a fait paroistre qu'il auoit vne tres-grade liberté & fermeté en la coupe d'icelui. Bref, je croy estre obligé de dire, que s'il eust esté touché pour le dessein & Peinture de ce bon goust cy-deuant dit, on l'eust peu dire le nompareil, veu l'vniuersalité de son esprit. Dans ce mesmetemps estoit Lucas de Leydeni, Aldegraue, & diuers autres; Mais à cause que le grand nombre qui ont esté depuis, tous ne sont pas en haute reputation, Îe me contenteray d'en nommer parmy plusieurs quelques vns que les vrays connoissans tiennent pour tres-excellens, tant de ceux qui ont graué d'apres de belles choses, que des autres.

Dans le temps de Raphaël & Vrbin, il y auoit en Italie Marc Anthoine, & Augustin Venitien, qui ont graué plusieurs Stampes tres-bonnes d'apres les Oeuures de diuers excellens Peintres, comme dudit Raphaël d'Vrbin; Ledit Marc Antoine a tesmoigné par ses Oeuures qu'il estoit fort exact imitateur de ses Originaux, mais non pas de rechercher vne grande liberté de burin, & beauté en l'ordre & arrengemet des hacheures, fortisie-

ment & affoiblissement d'icelles, suiuant le pres & le loin à l'égard du Tableau ou seétion, ains au contraire tout y paroist d'vne mesme force, qui est à dire comme si tout 'estoit en vn mesme plan, ainsi que celace peut voir aux pieces cy-deuant nommées. Pres de ce mesme temps & au mesme pays,

Pres de ce mesme temps & au mesme pays, qui estoit depuis 1530. jusques en 1560. il y a eu sule Bonna Zone, Siluestre & Marc de Rauenne & autres, qui ont graué beaucoup d'Ouurages dudit Raphaël d'Vrbin, & en quelque sorte de la manière des deux cy-deuant nomnez, mais non au point de l'excellence de celles dudit Marc Anthoine.

Depuis eux outre diners autres, il y a eu les Mantouans, & des Stampes à l'eau forte, sur

les Oeuures du Parmesan & autres.

Dans le mesme temps ou enuiron, il y a eu Martin Ruota, Corneille Cort, l'vn & l'autre tres excellents Graueuts; Ledit Ruota a graué entre plusieurs choses deux differens Iugemens, dont l'un est celuy de Michel Ange, lesquels sont executez en tres petit. Corneille Cort a tesmoigné par ces Oeuures estre vn des sçauans Graueurs dont lon ait memoire, pour auoir montré par tout, estre tres-serme x resolu en l'execution de ses Ouurages; Il n'a pas exprimé non plus que ceux de cy-deuat, les grands Esloignemens par affoiblissemens; Mais pour ce qui est des corps à part, je les trouue paroistre ou exprimer dauantage le relief; La pluspat de ces plus belles Oeuures ont esté faites d'apres les Tableaux & Des-

seins de Frederic Zucre, & vne ou deux de Raphael d'Vrbin; Apres nous en auons eu pluficurs, entre autres Augustin Carrache, Cherubin Albert, le Villamene, puis quelque nombre d'années apres iceux, vn bon nombre d'excellens; Cherubin Alberta eu aussi bien que d'autres, plus de talent au dessein, qu'à la netteté & egalité des hacheures ; Il a graué auec grand Art plusieurs pieces sur les Oeuures de Polidore, de Carranage; Augustin Carrace, estoit aussi extremement scauant, & mesmeauoit vne tres-belle conduite de hacheure; sa maniere approchant aucunement de celle de Corneille Cort, toutesois plus tendre & ageable, comme cela ce peut voir en diuerses pieces, & entre autres celle d'vn Ence qui emporte son pere, laquelle est de l'inuention du Barroche; Le Villamene a eu à mon sens vne grande egalité d'hacheures, liberté, franchise & netteté au maniment du burin,& grand agreément; Et aussi vn tres-bon dessein entre plusieurs de ces beaux Ouurages, il se voit vne piece de l'inuention de Paul Veronneze, d'one presentation de lesus Christ au Temple. Or suffit dece nombre pour l'Italie, reste à deduire quelques-vns de ceux d'Allemagne, Païs-bas & Flandre.

Dans!'Allemagne du temps de l'Empereur Rodolphe, il ya eu des Sadelets, Gille, Iean, & Raphael, tous trois bons Graueurs, lesquels ont fait de si beaux Ouurages, qu'il reste vn regret en les voyans, qu'ils n'ayent esté du temps de Raphael d'Vrbin, car ils estoient à

mon sens, tres-capables de copier ou imiter ponctuellement toutes sortes de manieres, & d'exprimer és Tableaux la pluspart des tendresses du Colory, & aussi auec grande justesse & Art, les teltes, pieds, mains, & autres petites parties qui y sont comprises, tesmoins de Iean & de Raphael en ce qu'ils ont executé d'apres M. de Vos, le Bassan & autres; Et notamment de Gille, par vn tres-grand nombre de beaux Portraits, ensemble deux ou trois grandes pieces double fueille, l'vne d'une descente de Croix de l'inuention du Barroche, & l'autre d'une flagellation de Iesus Christ du Dessein de Ioseph Pin, & quantité d'autres, lesquelles on peut dire estre merueilleusement bien grauée, & auec grande netteté, jugement & Art.

Vn peu apresa paru Arman Muler, qui a fait paroistre vne grande hardiesse, fermeté & liberté de burin; Etaussi Henry Goltius, qui merite d'estre tres estimé, faisant de son burin vne grande pattie de ce qu'il vouloit, & se selon diuerses manieres; Apres luy, & dans le mesme temps estoit l'excellent Sanredam; puis le digne Suanebourg, dont plusieurs de ses Ouurages me rauissent, par la grande netteté, tendresse & belle conduite des hacheutes qu'il a faites sur les Desseins de Bloemard, & de Rubens. Il y en a eu & y en a encores en Italie, Flandre, Hollande, & sur tout à present en cette ville, vn grand nombre de tres-Excellens, & souhaiterois bien que

l'enuie leur prist, de grauer d'apres les belles Ocuures de Raphael d'Vrbin, le Poussin, & de tels Excellents Peintres du mesme Goust.

Pour ledit Art de la Graueure, il ne doit estre affujetty ainsi que celuy de la Peinture, à n'auoir point de maniere, dautant que les œuures d'iceluy, peuuent quoy qu'elles tendent à vne mesme fin, estre faites de diuerses fortes, & par exemple; lon sçait que chaque Graueur peut conduire ou mener des hacheures de diuers sens,& en plus grand nombre qu'vn autre, car l'vn exprimera son Ouurage par vne taille ou hacheure seule, en groffissant les traits plus ou moins selon la necessité; l'autre fera le mesme par deux hacheu. res l'vne sur l'autre; Vn autre ferala mesme chose par vn grand nombre, & mesme y adjoustant en diuers endroits, de petits traits, & des points, pour attendrir, noyer ou perdre ensemble, les Ombres, Teintes & demies Teintes; Et finalement d'autres executeront ces mesmes choses par petites hacheures ou traits, & par vn nombre de poinctillemens meslez parmy; & bien souuentle tout par plusieurs points, gros & menus, pressez & eslargis, selon l'occasion: Or ces choses estant bien executées, il est asseuré qu'elles arriue ront à vue mesme fin, qui est de bien exprimer la forme des corps & partie contenues en leur Original.

Bien est-il vray, & il en faut demeurer d'accord, qu'il y a quelques vnes de ces diuerses manieres, lesquelles semblent auoir plus d'aduantage à bien faire leur effet que d'autres, & sur tout celles qui sont tres-finies, toutesois c'est souve s'est s'est souve s'est s'est

qu'elle face bien l'effect qu'elle doit.

Et dautant que plusieurs personnes ont voulumespriser celles qui sont faites par vne seule hacheure, je ne seindrai pas de dire qu'ils n'ôt pas en cela toute la raison qu'ils croyent, & si bien ils en ont veu quelques pieces saites auec negligence, cela n'épesche pas qu'on ne puisse faire des œuures merueilleuses par icelle, & extrememét agreables à l'œil & tendres, & encore que l'oposition du pur noir au blac, donne vne sorte sensation à l'œil, ce n'est pas là où gist le sonds de cét Art; Car il arriue souuent qu'il saut faire en sorte d'exprimer vne bonne partie des Couleurs du Tableau par leur brun plus ou moins, selon que le dit Art de la Graueure le pourra permettre.

Il conuient aussi suiuant l'intention de quelques Autheurs, de ne s'attacher ny assu-jettir à aucune desdites Couleurs, en supposant que ce qu'on imite ne soit qu'vn blanc & noir, ou pour micux dire vn gris & blanc, Car il est tres-constant, principalement pour les Corps exposez dans le grand jour, comme pourroient estre des Figures de Marbre blanc ou de plastre, que leurs ombres ne paroistroient pas noires, mais au contraire gri-

sastres; C'est pourquoy je trouve qu'alors qu'en de telles Stampes ainsissans sujettion de Couleurs, les Ombres sont si noires, elles font mauuais effet à l'œil, à cause que le blanc du papier paroist trop creu pour les Ombres, ou lesdites Ombres pour iceluy: Cecy soit dit comme en passant sans m'estendre dauantage sur de telles particularitez, puis mesme que mon principal dessein n'est pas d'en dire aucune chose, mais bien d'y adjouster, que outre divers Graueurs à l'eau forte nous en auons eu vn par cy-deuant nommé I. Callot de Nancy, lequel a fait de si excellentes œuures, sur tout en petit, qui estoit son principal talent, qu'aucun d'auant ny d'apres Îuy jusques à present, n'a encore mieux fair; Cecy soit dit en sa memoire, puis qu'en ce genre d'ouurage il a esté presqueau delà de ce quel'esprit de l'homme pouvoit esperer,& qu'il est en partie la cause que nous ayons à present icy, & en diuers autres lieux, de tresexcellens hommes en cét Ait.

Et touchat la distinction des Copies de toutes les Stampes Originales, il saut auouër qu'elles sont bien plus saciles à bien imiter ou copier, que les Tableaux, quad ce ne seroit qu'à cause que les traits ou hacheures des vnes & des autres se sont saites & se sont, par des Outils nomez Burins, qui sont tous en quelque sorte de pareille sorme, & que pour faire vn trait ou hacheure grosse & deliée, il n'y a qu'à plus ou moins saire entrer ou ensoncer dans le Cuiure les dits Burins, qui est quasi la mesme

chole que d'imiter vne escrirure.

De plus l'Impression ou la maniere d'Imprimer l'vne & l'autre desdites Planches, est toute semblable, il n'y a que la Graueure à l'eau sorte, laquelle peut estre plus dissicile à imiter, à cause que tous les Cuiures sur quoy lon graue sont ordinairement de differente nature; l'vn plus mol ou doux, & l'autre plus aigre ou dur; Pareillement les eaux sortes de differente, qualité force ou soiblesse; Mais ayant cy-deuant fait vn ample Traitté deladite maniere de Grauer à l'eau sorte, & du moyen d'en bien Imprimer les Planches, je n'en diray rien dauantage icy.

Pour celle en bois, elle se peut tres-bien copier, à cause qu'il ne faut qu'estre soigneux & exact d'espargner bien ses hacheures, & de couper net le bois, qui est à dire vuider bien nettement & sans bauocheures ce qui est blanc, en espargnant bien les hacheures rondement & droitement y donnant auec jugement & adresse, les hauteurs & abbaissemens necessaires, asin que les esseuées qui sont d'ordinaire les grosses hacheures, impriment sermement, & au contraire celles qui sont abbaissées impriment foiblement.

Toutefois il arriue de toutes ces choses quasile mesme qu'aux Tableaux, qui est que tant bien soient-elles Copiées, les Copistes n'estans point capables de Desseigner d'Inuention, ou du moins de Grauer apres des Tableaux ou Desseins lauez, où par consequent les hacheures ne sont pas exprimées,

font que leursdites Copies paroissent dures, seiches, & bien souvent plus noires queleurs Originaux, quand mesme ils conteroient le nombre des hacheures; De plus comme aux Tableaux, les Copistes ont peine de toucher auec Art, les touches qui forment les yeux, nez, bouches, pieds, mains, & autres telles parties; le mesme arrive aus dits Copistes Graueurs, ne les formant point auec art & liberté, ains au contraire auec peine, & par ainsi

en corrompent souuent la forme.

Pour connoistre vne Copie d'vne Stampe ou Taille Douce Originale, cette seule particularité suffiroit, sans auoir aucune connoissance de l'Art; qui est de remarquer soit en l'vne ou en l'autre, quelque trait ou hacheure, plus grosse ou deliée, ou bien plus presse ou essargie en quelque endroit, autrement il se peut remarquer encore cecy, que bien souvent il se trouve, que le Cuiure de la Copie ou Original peut estre en quelque endroit defectueux, soit par pailles, trous, ou autres rayes, qui prouiennent de la mauuaise qualité & polisseure dudit Cuiure, lesquels paroissent sur le papier à l'Impression; De sorte qu'ayant vne sois remarqué audit Original ou Copie, quelqu'vne de ces choses, lesquelles ne peuuent que par vne merueilleuse rencontre, se trouuet semblable en l'vne & en l'autre, lon peut s'en souuenir, & ainsi en estre asseuré; Et pour vn exemple assez grossier de ceci entre plusieurs, ceux qui sont Curieux desdites Stampes sçauent bien, qu'il y a vne petite descente de Croix d'Annibal Carrace, laquelle a efté grauée sur vn Cuiure tellement pailleux ou gerceux, que tout le haut d'icelle qui ne represente que l'air ou le Ciel & quelque partie du bas de la Croix, vient tellement sale & brouillée sur le papier, qu'il est du tout impossible de pouuoir rencontrer vn Cuiure pareil; Ainsi par cette seule particularité, & sans auoir aucune connoissance de la pratique de l'Art, lon peutaisement reconnoistre l'Original d'auccla Copie; le sçay bien qu'vn Graueur pourroit & auec dessein, imiter par la Graueure toutes ces rayes, pailles, & trous, mais cela ne se pratique pas, & en plusieurs telles rencontres il est comme impossible de ce faire: Toutefois les sçauants Graueurs, qui se sont adonnez à la distinction de ces choses, ne fondent pas leurs connoissances sur de telles particularitez.

Ie diray encore auant de finir, qu'il y a aussi bien que des Peintres & Curieux, des Graueurs qui ont connoissance de ces choses, & d'autres qui n'en ont point, & pareillement des Curieux, tesmoins ceux qui le sont de diuerses petites Tailles Douces, dont les hacheures si pressées, paroissent aux yeux les vnes dans les autres, ausquelles on a donné le nom de pieces sines, parmy les Marchands de Stampes & tels Curieux peu connoissans; Il y aaussi vn grand nombre d'autres Curieux, qui sçauent bien distinguer les bonnes d'auec les mauuaises, & si ce n'est pas en

toutes, par vne veritable connoissance ce sera

suiuant les moyens cy-deuant dits.

Il y a aussi vne chose à discerner ou remarquer ausdites Stampes, principalement és Originales, c'est lors que les Planches estant vsées à force d'Imprimer, on vient à les retoucher, qui est à dire r'entrerauec le Burin dans la plus part de ses traits ou hacheures, principalement en celles qui ne sont plus capables de contenir en eux le noir, pour s'imprimer ou s'attacher sur le papier : Or sur cela il est aisé en quelque sorte de croire qu'vne personne en peust remarquer quelque chose, puis qu'il est tres-difficile qu'vn Copiste puisse faire r'entrer son Burin si également dans ces premiers traits, qu'il ne s'y voye du trop en des endroits, & du peu en d'autres, & ainsi ayant vne sois veu l'Originale, noire & bien imprimée, & en suitte la mesme grise ou blanchastre quoy que bien imprimée, qu'il ne face la distinction de la retouchée. Or sur ces circonstances de noire, & grise & bien imprimée, & aussi retouchée, l'ay trouué à propos pour ceux qui ne sont versez en ces choses, d'en dire deux mots.

Ceux qui sont tres-Curieux desdites bonnes Stampes, sont estat des premieres impressions, qui est lors que les traits ou hacheures qui les composent impriment bien noir & bien net, & que le sond du papier en est bien blanc.

Les impressions qui prouiennent ainsi que

j'ay dit d'ine Planche qui a beaucoup imprimé, paroissent grises & peu sournies de noir, principalement celles grauées au burin; & lors qu'on leur donne plus de charge par la Presse, on leur fait rendre plus de noir, mais le mal est que les dites hacheures ne paroissent plus si nettes sur le papier, ains au contraire escachées & comme maculées: Mais pour les retouchées elles sont beaucoup moins estimées; puis les Copies encore moins, chacune suiuant qu'elles sont, plus ou moins mal Copiées.

l'auois oublié de dire, qu'on voit vn grand nombre de Batailles, Chasses, & autres telles choses, desseignées & grauées à l'eau forte par Anthoine Tempeste, lesquelles sont excellentes, sur tout en l'inuention, disposition & expression d'icelles; Mais pour la netteté de la Graueure elle n'y est pas grande. Il estoit

à Rome du temps de Villamene.

Reste pour clorre ce Traitté de parler du choix des Sujets & du chemin que doit tenir celuy qui desire s'auancer promptement &

facilement à bien Pourtraire.





CHAP. VIII.

TOVCHANT LE CHOIX des Sujets & du chemin pour arriuer facilement & promptement à bien Pourtraire.

M On sentiment est que de tous nos Arts, il n'y en a aucun plus composé & indu-strieux que celuy à qui on a donnéle nom de Pourtraicture & Peinture, & que ceux qui se veulent rendre en quelque sorte parfaits en la pratique d'iceluy, doiuent auoir l'esprit bien vniuersel, l'imagination forte, l'œil bon à discerner la forme des Objets en toutes leurs circonstances, & la main libre, pour se la rendre ouuriere & exercée en la pratique d'i-celuy; & de plus auoir connoissance des mefures d'vne grande partie des diuers corps vifibles de la nature, ou du moins de sçauoir prendre lesdites mesures au besoin;

Et c'est ce qui a fait, que diuerses personnes ont dit & escrit, qu'il falloit qu'vn Excellent Peintre eust connoissance de tous les autres Arts, puis que le sien doit representer vniuersellement tout ce qui se peut rencontrer de visible à l'œil humain.

l'auois eu enuie de ne repeter point ce qui est contenu aux trois ou quatre articles suitians, puis qu'il a esté dit au commencement de ce Traitté; Mais ayant dessein d'expliquer en gros l'ordre que peuuent tenir ceux qui dessrent apprendre la pratique de cét Art, je me suis trouué obligé de le resterer pour en zafraischir la memoire.

L'effect donc que cét Art doit produire est, de si bien representer ou copier sur vne surface platte, soit mur, bois, toile, cuiure, ou autre matiere, tous les Corps visibles de la Nature, que cette representation face auoir la mesme sensation ou vision à l'œil de ceux qui la regarderont, que feroit les dits corps s'ils y estoientainsi presens ou exposez deuant luy: Or cette surface plate, de telle matiere & en quelque situation qu'elle soit est commune-

ment nommée TABLEAV.

Il y a ainsi que j'ay dit, deux moyens vsitez de representer la plus grande partie de ces corps sur cette surface platte ou Tableau, l'vn est, qu'ayant tous les dits corps ou partie d'iceux deuant l'œil, ou bien leur forme ou celle des autres qu'on peut auoir empreinte dans l'imagination, de les Desseigner & Peindre simplement comme à veue d'œil, sans aucunement s'y seruir de regle ny de compas, & par ce moyen amener son ouurage à quelque sorte de persection; Or cette maniere est la plus communement pratiquée par les moins sçauans, en la raison sondamentale de cét Art, dautant qu'elle ne sçauroit que par hazard faire produire à l'ouurage l'essect que l'œil en peut desirer, principalement

pour les Tableaux historiez & composez de differents corps, comme Figures, Bastimens,

Meubles, & plusieurs autres.

Le second est, de sçauoir la mesure de toutes les parties des corps qu'on desirerepresenter sur cette surface, & de la situation des mesmes parties, & de l'œil du regardant, ensemble des Iours, Ombres, & Ombrages, & en suitte trouuer aussi par raison, la place & proportió des sortes & soibles Touches, Teintes ou Couleurs claires & brunes; ou comme on parle ordinairement, celle de la diminution des Iours & Ombres, suiuant qu'elles sont prés ou loin du Tableau dans le Naturel.

Or cette maniere ou second moyen est le plus certain, pour arriver à faire ainsi que j'ay dit, que l'œil reçoiue la mesme sensation ou vision en regardant le Tableau, qu'il seroit en regardant lesdits corps ou objets naturels.

Il y a plusieurs causes qui ont fait que cette derniere manieren'a pas esté si genera-lement pratiquée, entr'autres celle-cy, qui est qu'on n'en a pas eu tousiours les regles expliquées familierement, au contraire tresembarassées, ce qui faisoit souvent qu'és occasions & sujettions, la pratique alloit à l'impossible, & de plus estoient incomplettes n'y ayant rien d'expliqué de la raison des forces & soiblesses des Teintes & Couleurs cy-deviant dites, desquelles on n'auoit point escrit en public auant le Traitté de Perspectime

H iij

que j'en ay fait, où toutes ces choses sont amplement descrites & expliquées: Bref il n'y aucun moyen asseuré de bien faire la representation, Pourtrait, ou Peinture d'vn quelconque corps, que par l'intelligence de la regle qu'on nomme ordinairement la Perse pective, laquelle est à presentreduite à vne telle facilité, que plusieurs Peintres & autres, & moy pareillement, l'auons apprise en moins de deux heures, & aussi tost misé en pratique, en ayant l'obligation à son Autheur, duquel j'ay le bien d'estre connu & aimé, nommé Desargues, de la ville de Lion, tenu pour vn tres-excellent Esprit & grand Geometre.

Mais encore que ladite regle de Perspectiue, soit la Baze ou pour mieux dire l'ame de
la Pourtraiture & Peinture, cela n'empesche
pas qu'il n'y ait plusieurs particularitez qui
seruent tres-fortà persectionner les ouurages
de cét Art, neantmoins auant qu'en faire
quelque denombrement du moins en gros,
je tascheray de m'expliquericy de suitte des
commencemens que je trounerois à propos
de prendre pour en commencer la pratique,
car de les vouloir traitter à sond & par le menu, cela meriteroit qu'on en sist yn bien gros
Volume, & non pas qu'on l'adjoustast ainsi
sur la fin d'yn discours, qui n'est qu'yne petite parcelle ou particularité, de l'effet & production d'iceluy.

l'auois fait il y a quelques années vn discours manuscritassez ample sur cela, que je n'ay desiré mettre en lumière auant qu'en auoir dit quelque chose en gros, pour voir si l'esbauche de cét Ouurage seroit en quel-

que sorte approuué.

Povr céteffet je dis, qu'il faut d'abord & principalement en jeunesse, s'exercer L'œil & la Main; L'œil à bien distinguer la forme des corps, leurs Couleurs, Iours, Ombres, & Ombrages, & autres dependances d'iceux, la Main, à se la rendre libre, praticienne, & ouuriere, tant à Desseigner qu'à Peindre.

Ayantainsi exercé ces deux parties, il faut apprendre quelque chose de la Geometrie pratique, & l'ysage de mesurer ce qui se peut des Corps visibles de la Nature, comme des Humains, Animaux, Bastimens, Meubles, & autres semblables; Ensemble les Espaces d'entre iceux suiuant leurs differentes positions; En vn mot en pouvoir representer ce qu'on nomme le Geometral, sçauoir le Plan ou Assiette, le Profil, & L'Esleuation par Figure, ou par vn simple Deuis; Et afin qu'on ne croye celatrop difficile, j'aduertis que c'est ce que la plus part des Compagnons, Charpentiers, Massons, Menuissiers, & autrestels Artisans sçauent faire, & ce qui peur estre expliqué par plusieurs qui enseignent les Mathematiques.

Or cette pratique du Geometral bien entendue, donne le moyen de mettre en Perspectiue tous les corps dont lon peut auoir on squoir la mesure, sans aucune difficulté ny peine, dautant que la regle de pratique la Perspectiue, n'est differente en aucune façon

de celle du Geometral.

Ie ne m'estendray donc point d'escrire ny enseignericy, aucune desdites pratiques, puis qu'il y en a au jour des Traittez tres-amples: & encore qu'il semble à le bien prendre, qu'il suffiroit à vn Peintre afin de passer pour sçauant en son Art, de sçauoir si bien representer dans ses Tableaux toutes les choses visibles de la Nature, qu'elles fissent les mesmes effects à l'œil cy-deuant dits, pource qu'y ayant des Gousts ou Affectatios de manieres, de l'air & proportion des Figures, de leurs Habits ou Draperies, & suiuant les diuers païs & modes, ensemble les Païsages, Bastimens, Meubles, & autre chose d'vsage, il n'y auroit qu'à l'aduertir de ces distinctions; toutefois lon voit que plufieurs Peintres qui ont eu reputation de les bien executer ainsi, n'estans pas aduertis des erreurs qu'ils faisoient, ces manquemens ont esté la cause du mespris de beaucoup de leurs Ouurages, & pour m'expliquer mieux sur cela, Ie dis que tout ainsi qu'on reconnoist par l'air du Visage, les diuerses Nations les vnes des autres, ensemble leurs Formes de Vestemens, & autres choses de service, lon peut pareillement distinguer les Peintures ou Tableaux qui les representent, & qu'vn Peintre feroit mal de se seruir d'vn Modelle ou Original Anglois, ou Suedois, pour representer vn Espagnol, ou Italien, & aussi le mesme d'vn Bastiment Gotique, pour vn des anciens

Grecs, & de plusieurs autres diuerses choses de leur vsage; Neantmoins cela n'a esté & n'est encore que trop pratiqué par plusieurs Peintres de diuers païs, ainsi que j'ay dit, quoy qu'ils ayent acquis grande reputation; Et il se voit des Tableaux representans diuerses Histoires anciennes, tant veritables que fabuleuses, comme par exemple d'vne Natiuité, Adoration, & autres du vieil Testament, où lon reconnoist que lesdites Figures ont del'air des Flamands & Flamandes, d'autres de Venitiens & Venitiennes, François & Françoises, &c. & de plusieurs parties de leurs habillemens & autres choses de l'vsage de leurs païs ; & la cause de cela est, à mon aduis, qu'ils se sont seruis pour modelles des Figures dulieu de leur demeure; Ce n'est pas que la plus part n'ayent tasché en les saisant de les desguiser, mais non jusques au point qu'on ne les reconnoisse encore en tenir beaucoup de l'air.

Or pour euiter ces choses, en cas qu'on voulust que chaque figure & autres corps qui seruent à ordonner & former les diuers Tableaux sussent executez ponétuellement se son leur naturel, si c'estoient Histoires tres-anciennes, comme celles du Vieil Testament, il faudroit rechercher soigneusement les bons liures qui traittent de ces choses, & ainsi le mesme de l'antiquité, comme des Iuiss; Grecs & Latins, & en suite des autres Nations qui ont esté & sont encore à present, De sorte que voulant representer dans vn Ta-

bleau l'vne d'icelles en particulier, ou plufieurs ensemble, chacune fust traittée en sa verité, tant comme j'ay dit en l'air des figures humaines, qu'en leur geste & autres actions dependantes d'icelles, & en leurs vestemens ou draperies, puis en quelque sorte en la forme des terres & lieux, où est leur habitation, & aussi des vtensiles de leur vsage ; Car par ce moyen chaque chose representeroit ainsi le vray: Mais d'autant que tout cecy ne suffit pas encore entierement à former vn Tableau qui soit ce que les tres-sçauans tiennent pour excellent, qui se nomme à present parmy eux la bonne maniere, autrement le bon ou grand Goust; à cause que de tous ces corps visibles de la nature, il y en a en diuers païs dont la proportion & air, est plus agreable à l'œil de quelques personnes qu'à celuy d'autres, tant des figures humaines que des bestiaux, & partie de la terre, & en suitte des Ouurages faits par l'industrie des hommes, comme les ba-Itimens, & diuers autres, à cette occasion il est à propos de sçauoir faire cette distinction, afin de se seruir au besoin de ce qu'on peut nommer beau.

Reste la derniere & plus difficile chose à acquerir que doit sçauoir vn Peintre outre ce que dessus, c'est de faire en sorte qu'alors qu'il a entrepris de representer vne Histoire tellement ancienne, qu'on ne puisse auoir memoire, ny vestige quelconque des sormes d'habillemens, bastimens & autres particularitez, d'en inuenter, lesquelles soient entiere-

ment différentes de celles dont on peut auoir connoissance, ainsi que je l'ay expliqué au commencement de ce traité en la huiet & neusième page par la comparaison des Historiens & Poëtes, d'auec les Peintres.

Or sur cela je dis, que je n'ay encore veu aucun Traitté particulier ny public, qui prescriue vne proportion determinée des figures & autres telles choses, non plus que du choix des plus beaux Ornemens, bastimens, &c. Mais bien quelques gousts & opinions, ainsi qu'à fait Albert Durer, Iean Cousin & quelques autres sur la proportion du corps humain.

Cela n'a pas empesché que divers Excellents esprits n'ayent fait effort chacun en particulier, d'en faire quelque recherche sur les fragmens de diuerles figures & bastimens faits par des anciens Sculpteurs, & Archite-Aes, comme entre autres pour les figures humaines, de l'Hercule de Farnese, & du Commode pour des hommes forts, & du Gladiateur pour vn Luiteur : de l'Apolon, du Meleager, du Lantin, pour des Ieunes hommes: pour des Vieillards, des fleuues du Nil, Tibre, & le Laocoon: pour des femmes, de la Venus de Medicis, Flora, & Cleopatre, & quantité d'autres belles figures tres-estimées, & dont de la plus grade partie nous en auons des bronzes & des plastres, par le moyen des creux ou moulles qui ont esté faits sur les Originaux qui sont à Rome.

Outre ces choses, ils se serventaussi des di-

uers beaux bas reliefs ou demyes bosses Antiques, lesquels outre leurs belles proportions donnent de grandes lumieres pour l'Histoire, soit veritable soit fabuleuse par leurs vestemens tant composez qu'autres, & de plusseurs vensiles de diuers seruices.

Le mesme des bastimens & beaux Edifices, Ornez des Ordres de Colomnes, & de quantité d'autres Ouurages des anciens Grecs &

Romains.

Ainsi à present plusieurs Peintres sont la mesme chose, & se rendent tres-excellens par cette estude, & par la lecture des bons liures qui traittent de plusieurs particularitez de l'antiquité; C'est pourquoy outre diuerses qualitez & connoissances dont doiuent estre doüez ceux qui desirent pratiquer à ce point, ce noble Art de Pourtraiture & Peinture, celle-cy en est vne assez necessaire; d'auoir l'esprit propre pour la lecture, asin de bien entendre & distinguer dans icelles, les choses qui peuuent seruir à ses entreprises.

Et d'autant que par la corruption des téps, plusieurs se sont adonnez à la pratique de cét Art, sans sçauoir s'ils en estoient capables, soit de leur propre vouloir, soit de celuy de leurs Superieurs, j'ay creu necessaire d'aduertir que si fortuitement vn de cent rencontre par cette voye, c'est comme par miracle, c'est pour quoy nul ne se deuroit porter ny porter aucun à apprendre cét Art, à moins de se resoudre de n'estre que Copiste des Corps visibles de la nature ou de partie d'iceux; qu'il ne secust

sceuk assez bien escrire & lire, & fur tout ce qui est de principal, auoir donné lieu en luy monstrant diuerses Tailles-Douces & Delfeins, de juger par la description qu'il en fera, qu'il en a conçeu la forme, la situation & disposition; Car j'ay veu & connu de la jeunesse & autres assez aduancez en aage, lesquels auoient les yeux & le jugement si peu duit à discerner ces choses, que quelques - vns m'ont autres fois demandé, en regardant vne Stampe on Taille-Douce, laquelle representoit diuerses figures vestuës à nostre mode, comme de la Noblesse d'autre sexe, si c'estoit vn païsage, ne pouuant pas mesme trouuer le sens ou la veritable position requise, pour les considerer; Or je trouue que ceux qui ont les yeux & le jugement de la sorte, ne sont guere propre à apprendrel'Art de la Pourtraiture & Peinture, ny mesme auoir connoissance des choses cydeuant dites, sur lesdites manieres & Originaux.

Il n'ya personne qui aye desir d'apprendae quelque Art ou Science, qui ne fust bien aise de trouuer quelqu'vn qui y soit tres expert & entendu asin de se faire instruire.

De mesme celuy qui veut enseigner, doit ce me semble examiner si le disciple a disposition & inclination à connoistre ces choses & à les apprendre, & d'autant que je suis promptement venu à conclure la fin de la pratique de cét Art par ce discours, je mettray icy de suitte en abregé l'ordre ou chemin que

doit tenir celuy qui desire y commencer, ne donnant ce que j'en ay cy-deuant dit, que pour vne preparation ou aduertissement, lors qu'on est aucunement auancé en ladite pra-

tique, Mais pour entrer en icelle.

Premierement il faut commencer à Desseigner d'abord à veue d'œil, d'apres des Tailles-Douces de Raphael d'Vrbin, telles qu'elles ont esté cottées cy-deuant és pages 33, & 34. & de celles prises ou imitées des beaux bas reliefs & des belles Sculptures Antiques, ainsi qu'il s'en voit vne grande quantité grauée à l'eau forte, par F. Perrier, ditle Bourguignon, un des grands Peintres de ce temps, & par quelques autres, fans s'amuser à aucune autre, si ce n'est qu'elles soient de ce goust ou maniere, & asin de ne pas commencer cette pratique à veue d'œil sans aucun precepte, j'ay bien voulu en donner vn dans la première Planche qui viendra sur la fin de ce Traitté.

En suitte desdites Tailles-Douces, il saut copier sur des Desseins & Tableaux saits par ceux qui sont les Inuenteurs d'icelles, puis apres il se saut servir des beaux & bons Bas Relies ou demyes Bosses Antiques, ou de ce goust, les Desseignant tant à la lumière de la sampe, qu'aux diuers grands lours & lumières, & ainsi de plusieurs differents corps visibles de la Nature, comme des vestiges des bastimens & autres parcelles de l'Antiquité, d'abondant en saite le messe de se testes & sigures de rondes Bosses cy-deuant nommées, & pour conclusion bien notter, qu'il faut saite

effort autant qu'on pourra en Desseignant desdites Figures, Bastimens, & autres Corps, d'en bien retenir dans l'imagination, l'air, & la proportion de toutes les parties d'iceux & d'icelles, afin que venant és occasions se servir des figures humaines, pour leur donner les attitudes ou actions conuenables au fujet qu'on veut representer, lon puisse corriger les desfauts qui s'y peuuent trouuer à cause qu'il est comme impossible de pouuoir rencontrer des figures d'homme, de femme, ou d'enfans, qui soient bien proportionnées en toutes leurs parties, comme cela se voit ausdites figures antiques, estant croyable, que ceux par qui elles ont esté faites, auoient choisien plusieurs corps naturels, toutes ces belles parties, pour les former ou rendre ainsi complettes.

Ayant donc assez long-temps Desseigné sur les dires Sculptures, & bien retenu dans l'imagination leur air & proportion, de sorte que lon se soit rendu capable de les representer ainsi sans voir le relief, & d'en sormer d'autres de diuerses attitudes ou actions qui ayent ces proportions; Alors il faut copier d'apres le Naturel, le sormant aux occasions selon

l'air desdits Antiques.

Et estant arriué à ce point de desseigner apres le naturel & ainsi le corriger à l'occasion, il faut pratiquer commeil a esté dit, le moyen de trouuer les mesures Geometrales des corps donton veut former vn Tableau, pour puis apres les mettre en Perspectiue, à

laquelle chose il fauts'exercer, lors qu'on est venu au point de Desseigner d'apres le relief,

soit de ronde Bosse, soit du Naturel.

Ainsi ladite regle de la Perspective donnerala connoissance vniuerselle à celuy qui sera exercé à celle du trait & proportion des Corps visibles de la Nature, & aussi d'en composer de son Inuention, ensemble au maniment du Pinceau & alliage des Couleurs, à Fraifq, à Destrempe ,ou à Huile , de representer tous les Corps imaginables de la Nature, tant en general qu'en particulier, afin que la Copie ou Tableau qui s'en fera, fasse aux yeux de ceux qui le regarderont autant que l'Art & la capacité de l'Ouurier le peut permettre, la mesme sensation ou vision que feroient lesdits Corps; Et pour ce faire elle vous donne-ra non feulement la precifion de la place des Contours ou Traits de la plus grande partie desdits Corps ; Maisaussi celle de leurs Tours, Ombres, Ombrages, ensemble l'endroit de la Force & Foiblesse de leurs Touches, Teintes ou Couleurs: Et finalement vous enseignera comme les Corps colorez estans veus de front & esclairez ou illuminez, ont la Couleur plus forte & plus viue que ceux qu'on voit fuyans, & que d'vn corps rond les tournans equipolent à vn grand lointain, desquels il en faut forcer l'affoiblissement, si on veut les faire paroistre, s'arrondir; maistoutes ces choses estant deduites dans mon Trairté de Perspective assez au long, jen'en parleray point icy, bien diray je que si tous les Tableaux se saisoient ainsi par regle de Perspectiue, les yeux de ceux qui les regarde-roient en seroient mieux satissaits, & n'y remarqueroient pas tant de dessauts qu'à ceux qui ne sont entieremet saits qu'à veue d'œil:

Ie me suis trouué obligé de rebattre icy,

que si ceux qui desirent paruenir autant promptement que leur naturel ou disposition le pourra permettre au but de ce Goust ou maniere du bel Antique cy-deuant dite; qu'il faut absolument ne s'attacher ny mesme en considerer aucune autre; Car ainsi faisant lon se l'imprimera fortement dans l'imagination; Et pour en auoir des preuues suffisantes, cela se peut voir entr'autres és œuures dudit Poussin cy-deuant nommé, par lesquelles lon remarquera que depuis treslong temps il auoit cette inclination ou but & qu'il n'a jamais changé & rechangé de maniere ainsi que plusieurs autres qui n'y one par ce moyen trouué leur conte, & ce qu'il a le plus augmenté en ses œuures depuis quelque temps, est au Colory, Ombres, & Ombrages & à leur fortifiement & afoiblissement fuiuant la taison ou tegle, laquelle il n'a pas à mon jugement toussours possedée ou entenduë comme il fait à present.

Moyen de faire faire aux Tableaux l'effet qu'ils doinent.

M'Estant cy-deuant obligé de representer par discours & en vne Planche ou Figure, vn moyen de faire faire aux parries ou corps qui composent les Tableaux plats l'effet qu'on desire, & la petitesse de la page qui doit seruir d'explication à la Planche qui suit, ne permettant pas grand discours; lediray icy pour y suppleer qu'ayant à faire vne telle chose, je choisirois le Lieu, Station, ou Aspect, d'où lon desirera voir lesdits Tableaux: Si c'est dans vne Salle, Gallerie, Chambre ou Cabinet, je determinerois ce Lieu ou Station, au milieu ou suiuant l'endroit le plus couenable d'icelle; puis ayant arresté la grandeur de mes Tableaux, tant en leur largeur que hauteur, je mettrois la ligne du plan de l'œil on horizontale, à quatre pieds & demy du plan d'assiette ou plain pied de la Cham-bre, puis ayant conté le nombre des pieds qu'il y auroit de la station ausdits Tableaux, je tracerois, couperois, ou diuiserois, ausdits Tableaux mes eschelles fuyantes & de front, & paricelle je traitterois tout mon ouurage; par ainsi il est asseuré qu'ils feroient vne partie de l'effet qu'on desire, puis que c'est le vray moyen de cefaire; Car ces Tableaux estans ainsi faits & posez, il n'y auroit qu'à se mettre au lieu determiné pour les voir, n'y ayant qu'à se tourner d'vn costé & d'autre, sans changer de place; Et dautant qu'il y a des personnes plus hautes les vnes que les autres, & qui parce moyen ont plus de quatre pieds & demy, depuis les pieds juf-ques aux yeux, j'ay pensé qu'il est plus com-mode ou facile aux grands de se baisser, que aux petits de fe hausser.

Et daut int que j'ay dit vers le commencement de ce Traitte que la plus part des Anciens Peintres faisoient leurs ouurages si acheuez qui sembloient dans le destail qu'ils euffent regardé leurs Modelles de trop prés, le diray que voulans determiner vne distance raisonnable a moins que d'estre contrain& ou assujetty, il faut qu'elle soit du moins aussi esloignée du Tableau que la plus grande hauteur ou largeur d'iceluy, plustost plus que moins; & pour moy je trouue que la distance du double de ladite largeur ou hauteur, est tres raisonnable & fait faire bel effet aux Sujets : Or ainsi faisant l'œil tant bon soit-il ne pourra pas discerner si distinctement au Naturel les poils & autres menues parties, ainsi que la plus part de ces Anciens Peintres ont fait.

Lon sera aussi aduerty qu'on peut és occafions faire diverses stations, quand il y a plu. sieurs Tableaux, comme és Galeries où il y en peut auoir aux fonds & aux costez, & que la largeur d'icelles oblige à prendre vne courte distance, ainsi que je l'explique dans la derniere Planche.

Suit l'explication de la pratique de Desseigner d'apres les Tailles Douces, Delleins & Tableaux ensemble sur le Relief:



PREMIERE PLANCHE.

Cette Planche est pour expliquer vne pratique, pour passablement Pourtraire precisement à veuë d'ail, les Corps visibles de la Nature.

Bien que j'applique seulement cette pratique de Desseigner à veue d'œil sur vne seule teste ainsi qu'en la Planche qui suir, cela ne sait pas qu'on n'en doine saire le melme sur vne sigure entiere, & sur plusieurs & autres diuers Corps formant Histoire; mais pour vn commencement il sussire de cét

exemple.

Ie presuppose donc, qu'on ait à Copier sur vne surface platte, soit papier, carte, toille, &c. vne telle Teste ou autre telle chose de Taille Douce, Dessein, ou Peinture, & qu'on ait tiré suricelle vne ligne à plomb AB, comme en ladite Planche, en tel lieu & endroit qu'on voudra, soit au Crayon ou autrement; puis en suite vne autre, laquelle luy soit perpendiculaire ou à l'equerre, ainsi que celle CD.

Parcillement qu'on aye fait la mesme chofe sur le papier ou autre telle surface où lon desire faire sa Copie; selon qu'on s'en est determiné la proportion plus ou moins grande, lon doit observer ce qui suit, toutesois mon sentiment est qu'alors qu'on a pour Origi-





nal vn Ouurage fait en petit ainfique sont ordinairement les Desseins & Tailles Douces, le meilleur est de faire sa Copie beaucoup

plus grande.

Cela fait lon doit choisir vn endroit conuenable pour poser droit, fixe, ou arresté deuant soy ion Original ou Patron. Puisilfauc se placer vis à vis & prendre vn essoignement ou telle distance auec laquelle lon puisse facilement, nettement, ou distinctement, embrasser d'vne seule œillade le contenu d'iceluy: Et pour operer ou pratiquer il conuient d'abord auoir égard à placer en grosautant precisement & proportionnellement quo l'œil d'vn chacun le pourra permettre les parties mn, cs, hk, qui se rencontrent sur la ligne à plomb AB, & sur celle de front CD, comme lo, tq, puis faire le mesme pour les autres plus menues parties, aussi de gros en moins gros, en regardant toufiours ce qui se peut rencontrer à plomb tant à droit qu'àgauche de ladite ligne AB,& de celles qui luy seront paralelles comme la ligne 0, p; & ainsi la mesme chose par le moyen de celle de front CD, en considerant exactement les parties qui se rencontrent au dessus ou au dessous d'icelle & sur les autres qui luy pourroient estre paralelles telles que rs, & ainsi continuellement de toutes les petites parties tant du Trait que des Iours, Ombres, & Ombrages.

Mais quelques personnes pourroient dire qu'il vaudroit autant avoir tout d'vn coup sait vn Treillis ou petit Pied: A cela je répons que ce ne seroit pas suiure mon intention, dautant que d'ordinaire le petit Piedattache l'œil du Disciple à Copier de son Original chaque partie à part, & par ce moyen il ne luy en reste pas l'idée ou forme en general; ce qui est tres-necessaire pour se rendre vn jour capable de faire de Resouuenir ou D'inuention : Car encore que j'aye diricy, qu'il faut tracer les lignes AB, & CD & autres, sur son Original & sur son papier; Ie n'entens pas qu'on en face vn continu, Car il se rencontrera des Sujets & des Occasions, où il est impossible de le faire; outre que ce seroit prendre d'a-bord vne habitude mauuaise; Mais c'est seulement pour en conceuoir mieux la pratique; & pour exemple, je dis que quand vn Disciple aura vn peu pratiqué effectiuement cette forme de regle ainsi à veue d'œil; Il faut, lors qu'il viendra à Copier sur desdits Originaux de Taille Douce, Dessein, & Peinture, ou bien sur des bas Reliefs, rondes Bosses, ou Naturel; qu'encore bien qu'il n'y ait sur, ou deuant iceux, aucunes telles lignes, il faut qu'ils'en forme ou qu'il en conçoiue, par le moyen des parties qui se trouueront ains à plomb, & de front, vis à visles vnes des autres, premierement en gros, puis jusques au destail; & comme cela, s'estant bien placé, en sorte qu'on ne change point la position de l'œil ou de la veuë, lon peut Copier ces parties suiuant qu'elles se rencontrent à plomb, & esloignées d'en haut ou d'en bas,

PREMIERE PLANCHE.

107

à droite & à gauche des vnes ou des autres; Ainsi voila à mon sens la naturelle pratique ou regle, dont on se puisse servir pour Desseigner à veuë d'œil sans ayde de regle ny de Compas.

Et pour celle qu'on nôme communement la Perspectiue, l'ample Traitté que j'ay mis au jour il y a quelque temps, ainsi qu'il a esté dit, m'empesche d'en rien dire en celuy-cy.




MAintenant touchant la position des Tableaux & la distance qu'il conuient

prendre pour les regarder.

La ligne A B, est pour representer la figure du regardant; A, est l'endroit de l'œil, B, celuy des pieds, cette grandeur A B, est supposée de quatre pieds & demy, Le Tableau GFDE, & pareillement les deux autres gfde, &, gfde, dont le premier paroist estre placé à vn des costez d'vne maniere de Cabinet ou Galerie, l'autre à l'vn des bouts, & l'autre au plancher, lambris ou plat fonds; Celuy du costé & du bout, sont supposez esleuez de deux pieds trois pouces, du plain pied, ou à la hauteur d'vn lambris, & de quatre pieds de large chacun, & la distanceaussi, qui est la ligne A C, à la reserve de celuy du bout, dont la distance est de six pieds & celuy du plat fonds, pareillement l'vn de ses costez est de quatre, & la distance aussi: Par ainsi si tous ceux qui font des Tableaux en de tels lieux sçauoient la pratique de la Perspectiue, & qu'ils voulussent placer le point de veue & couper leurs Eschelles perspectiues felon les lieux & les distances conuenables, & en suitte Desseigner & Peindre les Ouurages desdits Tableaux en ce qui se peut par ladite regle, il est tres-assuré qu'ils leur feroient faire vn tres-grand effet , ainsi que cela se peut voir en quantité d'Ouurages qui ont esté executez de cette sorte par d'excellens Peintres. Et encore que plusieurs Tableaux paroissent

Deuxiesme Planche





paroissent aux yeux de diuerses personnes, tres-beaux & bien-faits, tant en la situation des Corps qu'en leur proportion Perspectiue, Iours, Ombres & Ombrages; Etsinalement en leurs sorces ou soiblesses. Ceux qui sçauent la regle vniuerselle de la Perspectiue n'en seront passe mesme jugement, ains que p'ay cy-deuant dit, ains au contraire ils y trouueront de sensibles dessaus & en tresgrand nombre, sur lesquelles choses ils ne diront pas seulement cela n'est pas bien, mais lors qu'il en sera de besoin, ils en seront voir la raison claire & euidente & le moyen d'y remedier.

S'estant rencontré sur la fin de l'impression de ce Traitté, quelques pages qui eussent demeuré blanches; le me suis trouué obligé pour les remplir, d'y adjouster une partie du discours qui suit.

Ncore que j'aye donné cy-deuant des preceptes qui semblent estre particuliers, pour la situation de quelques Tableaux, cela n'empesche pas que la mesme pratique ne s'applique à ceux qui sont inclinez; Et pour ce sujets'il y a quelqu'vn qui aye le desir de le seauoir, & aussi de faire les Eschelles Perspectiues de front & suyantes, & leurs vsages; Cela est amplement déduit dans mon Traité de Perspectiue, ainsi que j'ay dit; Ensemble diuerses belles particularitez sur ce sujet, outre la pratique generale d'icelle.

Cen'est pas que ledit Traitté soit remply ainsi que plusieurs autres de diuers sujets ou Tableaux, ou pour mieux dire d'Images, pour seruir de modelles à faire quelques Perspectiues au bout d'vn Iardin ou Allée; Ains au contraire, en lieu de vous donner de tels modelles à Copier; Ce qui est contenu en iceluy, vous enseigne d'en faire ou former de vostre Inuention, en vous faisant voir par vn tres-grand nombre d'exemples, comme la regle ne varie ny ne change point à quelle occasion que ce soit. Cecy soit dit pour donner aduis à ceux qui ne sont point versez en toutes ces circonstances de ne se laisser pas volontiers surprendre aux Traittez de Perspectiues qui sont remplis de telles Images, à moins que cene soit auec intention de se recreer la veue sur icelles, & par ainsi il faut qu'elles soient de l'invention de quelque excellent Desseignateur.

Il ya aussi plusieurs tant Praticiens qu'autres, lesquels croyent estre impossible de representer par ladite regle de Perspectiue, vne grande partie des Corps visibles de la Nature; principalement les irreguliers & composez de diuerses petites parties, & sur tout celles qui sont formées par des lignes courbes, & qu'elle ne peut guere seruir qu'à la representation des bastimens & autres telles

choses.

A cela je respons, que ceux qui pratiquent ces regles, peuuent representer auec icelles vn grand nombre d'autres choses, & aussi fçauent bien prendre la mesure de la grosse masse deces Corps, & grande partie du detail; Et touchant ces plus petites parcelles irregulieres, la connoissance du tres-fonds de la pratique leur montre en suitte à les placer sans regle ny compas bien à peu prés du lieu & place où ils doiuent estre; Et dauentage s'ils placent plusieurs Corps, & en diuerses s'its placent plusieurs veuë d'œil, il sera soutent assez difficile d'y remarquer de notables sautes.

C'est pourquoy lon fera cette reslexion, que j'ay toussours eu l'intention de ne point separer entierement la pratique de Desseignerà veile d'œil, d'auec celle par mesure & regle effectiue: Ains au contraire les marier ensemble, d'autant qu'on ne peut pas tousjours auoir le plan , profil & Esleuation Geometrale de tous les corps; Cen'est pas parce que je dis, qu'vn qui ignore ladite regle s'en doiue preualoir, Car il est tres-certain que celuy quin'en a point de pratique ny de connoissance, ne trauaille qu'en tastonnant ou au hazard; Ie sçay bien aussi qu'on pourra dire qu'il n'est pas necessaire de Tracer, Desseigner, ou faire le Trait & Contour par la regle de la Perspectiue, d'vne Teste ou Pourtrait, ny d'vn Païsage tel qu'il s'en peut rencontrer, ny aussi de diuerses Fleurs & autres telles choses, & que ceux qui pratiquent ou font de tels Ouurages, ne tracent d'ordinai-re aucune ligne sur ce sujet, je l'aduoüe, mais cela nefait pas que celuy qui est entendu en

K ij

cette pratique, ne sassejouer, ou ne se serve d'icelle en plusieurs lieux ou ceux qui n'ont pas cette connoissance ne peuuent croire qu'elle s'y puisse appliquer: Comme de bien placer sur lesdits Corps, & auec raison, la place du Iour, des Ombres, & Ombrages, ensemble celle de Touches, Teintes ou Couleurs, selon leur degré de sorce ou d'assoibissement, qui est ce que j'ay ouy nommer à ce grand Peintre dit, N. Poussim, La Perspective Accienne, ou de L'air.

A cette occasion diuerses personnes ont dit, & d'autres écrit, qu'il estoit impossible de donner vne regle dudit affoiblissement & fortissement autre que par le moyen de la veüe; Il en est bien quelque chose, Mais je nie absolument qu'on aye jamais trouué que la seule veüe aye determiné vne telle Couleur, deuoir estre moins sorte de tant ou de tant à l'égard d'vne autre plus ou moins éloignées de la baze ou bas du Tableau, ou selon la di-

stance dudit œil à iceluy.

Or il est temps de sinir ce Traitté, en priant ceux qui prendront la peine de le lire, de croire qu'il y a mille belles diuersitez sur les choses cy-deuant dites, & sur ce sujet, que je passe sous silence, les reservant pour vne autre, occasion si Diev le permet; Ensemble vn Traitté de pratiquer, les Ging Ordres de Colomnes en l'Architecture sur les Principes de Palladio, Architecte Italien; Et en suitte la Proportion du Corps humain, tant sur les beaux Antiques cy-deuant nommez, que sur q

ques vnes d'Albert Durer qui y ont rapport; Le tout par des manieres ou pratiques tresfaciles.

Love' soit Diev.

Correction & remarque de quelques fautes & obmissions, qui ont esté commises & obmises en ce Truisté.

Page q.il ya vn fleuron mis mal à propos. page 20. lignes 22. & 23. lisez proportion des figures, leurs vestemens, &c. p. 21. 1. 14. lisez vn Mariage. & en la l. 15. lisez desseigné. p. 24. 1. 18. lisez les Curieux, &c. p. 41. 1. 4. lisez Leonard Dauinci appellé vulgairement, Leonard Daluins, Peintre & Sculpteur. p. 50. 1.3. lisez expression suinant l'Histoire, & en mesme p. l. 22. lisez extremementau brun. p.53.1.17. lisez le Gobe. p 58.1.25. lisez difficile. p. 80. 1 24. lisez suiuant. p. 96 1. 12. lisez Romains sur les liures qui en traittent comme, Vitreune, Paladio, Scamofy, Vignole, & autres. p. 101. au bas lisez au Tiltre, Moyen de faire faire aux Tableaux l'effet qu'ils doinent suinant leur position.

Extraict du Prinilege du Roy.

Par grace & Priuilege du Roy donné à fainct Germain en Laye le 3. Nouembre 1642. Signé, LOVIS. Et plus bas, SVBLET: Il est permis à Abraham Bosse de la ville de Tours, Graueur en Taille-Douce, de grauer, faire grauer & imprimer, vendre, faire vendre & debiter par telles personnes qu'il verra bon estre, en tous les lieux de nostre Royaume, tous les Desseins en Pourtraiture qu'il desseignera de son invention ou qu'il aura recouurez de!'inuention de quelqu'autre; Ensemble tous Desseins concernans les Arts & Sciences dont ledit Bosse pourroit à l'aduenir tracer les figures, & dresser les discours de son inuention ou d'autres, & ce durant l'espace de 20. années accoplies du jour de l'acheuement de la premiere Impression : & defenses sont faites à toutes personnes de grauer, faire grauer, imprimer, vendre, debiter ny distribuer durant ledit temps en aucuns lieux du Royaume, aucune chose grauée ou imprimée qui soit extraite, copiée, contrefaite, imitée en tout ou en partie, d'aucun desdits Ouurages dudit Bosse, sans sa permission ou de ceux qui auront droict de luy, à peine contre les conreuenans, de trois milleliures d'amende, confiscation de tous les exemplaires. Le tout come il est plus amplement declaré dans lesdites lettres: verifiées & registrées, oui Monsieur le Procureur General en la Cour de Parlement, le 12. May 1643. Signé, GYYET.

Acheué d'Imprimer le s. May 1649.

A PARIS,

Del'Imprimerie de Pierre Des-HAYES, ruë de la Harpe, à la Rozerouge,







2 20

RARE 85-B 25053

GETTY CENTER LIBRARY



